

## **Kayëte Wapuyala ña Wade yehëhna hnë inji kayëte**

Hnë anji kayëte Wënu ña njëtëndanëka ale herëk a, mpëdara Afayik San, viyë vile rëfëka tëki ryënkwëhnið iboka Këris. Kerik yëbëlan bëhn wafëhw imbëd gë wahi gë bëhn wafëhw imbëd gë wahnah g'imbëd (70 gë 95) ga ndëcëk nagi Yesu ÿa hnë wati nte korotehndëfho cery sali ña.

Anji kayëte nësëd viyi viyabah vile fëhnëtanëk viyë vihawary soñe bulunda wasëwif. Mbëd gë wahi fëhnëtanëk ile fadëk ÿa. Nëm̄p yah ÿa fëhnëtanëk imëk inja do fëna ufacah wã. Nkol Babilon ña fëhnëtanëk Rom; hnë vanji vankol nke ucankaf meh.

Kayëte ña pëgwëhnanik gë wanës soñe vacery sali mbëd gë vaki hnë vacery sali vambë Asi hna. Ile rëfika ÿa kayëte hna, San njojik ambin hna hn'ile nuk toyë fo ile liyað ÿa hnë wapuyala ðuniÿa li ante mbokajëd Yesu ña: ðuniÿa ÿi përekanëde, Sintani ÿa këfëde, kitiñ tëkwa ña nkeð, do Yesu ntañad tinki ahnañ hnë Yerusalem kasëk hna.

Wëlin wanës wakwëhn nafa hn'inji kayëte: mëleka, ahnañ, kayëte, fape, hwëdëh, ambin, kopa, uwám.

Wëlin gante nke kayëte ka:

Simpayi (1.1-8)

Yesu cahnanika San (1.9-20)

Kayëte soje vële hwëtahnëk ye hnë vankol  
 mbëd gë wahi hna (2.1–3.22)  
 Icëmb ña ambin hna (4.1–11)  
 Fape fa gë kayëte nte ÿamëndëlehnik  
 wahwënta imbëd gë wahi (5.1–8.2)  
 Walënkwa mbëd gë wahi gë wahitiñ walëw hni  
 (8.3–11.19)  
 Vëyëw Wën mëkëden (12.1–14.20)  
 Wamëleka mbëd gë wahi gë wëkata wã (15.1–  
 16.21)  
 Iyo Babilon (17.1–18.24)  
 Imëk gë kitiñ tëkwa (19.1–21.8)  
 Yerusalem kasëk (21.9–22.21)

*Uyëtëndan: ile njetëndanëka Wënu ña San*

<sup>1</sup> Hn'ani kayëte nke viyë vile cowëtëk Yesu Këris. Wënu ña njëdakawo soje njetëndanëhni vëyohal vëlëwu va vile rëfëka tëki hara biyëna ÿa. Këris ÿa payëkawo mëleka lëwu ÿa ÿal mën, ami San ayohal alëwu, soje njetëndano virac.

<sup>2</sup> Sede yeñu hnë fop vile hnuñuho: rac ye wanës Wën g'ucedeya Yesu Këris ña.

<sup>3</sup> Ndëwayik ale harañëhnëdëhëhni vahnë wanës wante kerëhnëko Wënu ña hn'ani kayëte do ndëwayini vële wëryëd va do hwëtañ wante herik ña! Yëtëryin, wati le hahnëdik soje wanji fop ña tëhajëk.

*Simpañi le kerëhnini vacery sali Asi*

<sup>4</sup> Ami San herëhnëryidëhu, wühne vacery sali mbëd gë vaki vambë Asi vi. Arabi ipërëna wã gë yam ÿa ahnuñawu hnë Wën hna, umë ale ye,

yeho do yijëd, hnë wayir mbëd gë wahi hna wale ye haryënkw hnë tinki naŵ ntëwu hna,

<sup>5</sup> do fëna hnë Yesu Këris hna, sedë hahnëndak ÿa, ale ryënkwik vëhnëndehnik hnë vësëm hna do ye ahnaŵ vëhnaŵ ÿa nkal li fop! Umë ale ÿahnëkëfu do fehëtëkëfu hnë wameh fu hna gë sat lëwu ÿa,

<sup>6</sup> ntikëfu inaŵ vësëna wasadëha soje ndokuñëhnëndenëhna Wënu ña, Rëmu. Arabi kwëhn icëmb inja gë fanka fa kwëlëkwël! Amina.

<sup>7</sup> Yëkëryin, vëñar hna njijëd! Vahnë va fop nudëniha, wëla vële sëhëka va;✧ do fop wabulunda wabë nkal ñi njahnadëni soje lëwu ÿa. Ha! Amina!

<sup>8</sup> Ahwëhn a Wënu ña ntehnëk: «Ami ye Alëfa gë Omega, Aryënkwëryënkw a gë Arëkwa ÿa, ale ye, yeho do yijëd, Ahwëhn Fanka Fop.»

### *Hudakery San soje Ajë Ahnë*

<sup>9</sup> Ami San, aÿënta hun yebu; mbankinëk had wëhne gë Yesu hnë horot hna, hn'imëk hna do hn'iduñëna hna. Ntayibuho hnë tinti mbë wov le wacik Patëmos hna, kabi pëyahnëdëfuho wanës Wënu ña do sedë yebuho wëba Yesu.

<sup>10</sup> Hnë fac Ahwëhn hna, Iyir Ipacah ña tënkëkoŵo do hamëhni mën nkwëryëbu kopa sankaf had lënkwe,

<sup>11</sup> më lehnëdëho: «Kerëry hnë kayëte ile hnuđu ÿa, do yëdanahnëryihni vacery sali mbëd gë vaki vante ye hnë: Efes, Sëmirën, Perëgam, Tiyatir, Sarëdes, Filadelëfi do Lawodise.»

---

✧ **1:7 1:7:** San 19.37

12 Njëkadëfuho soŋe hnuwũwã ale hñesëndëhoŋo ŷa. Ga njëkabu, më hnuŋu wayul wasanu mbëd̄ gë wahi wakwëhn walampu, 13 do fagant wayul walampu warac, kahnëko ile mëntëlëni g'ahnë. Acud̄ cankaŋ nte rëkëkaŋo hafo wapary hna cudako do ñëba ryl yankah sanu sakahn lëwu hna.

14 Njerëkaŋo mul iŋa had perëkal. Vinkër va had hwëdëh pëtëdëhawo,

15 wapary ŋa had ryëhwëra vēntëvēnt facënik hnë hwëdëh nkehawo do kopa lëwu ŷa had uŋac wënka wov ñënkadëhawo.

16 Hnë vák rëhw lëwu hna, wamol mbëd̄ gë wahi mënkwëko. Wës lëwu hna sëlame ŷakënik hwëhn wanjekan waki sahnëdëho, do yëka lëwu ŷa ntancëko had ulav g'anent.

17 Ga nubuha, njobuho haryënkw lëwu had cëmëbu. Më tindëko vák rëhw lëwu ŷa do ntehno: «Antë ntaki! Ami ye Aryënkwëryënkwa a gë Arëkwa ŷa,

18 Ale yënëd̄ a. Cëmëbuho, do wëli tame ale yënëd̄ kwëlëkwël yebu. Visëdëta icëm va wënkëbu do gë viva ŷëwã vësëm ŷa.

19 «Awa kerëry vile hnuru va: vile ye gaki va do vile yejék va.

20 Wëli ile pëhnëtanëk wamol mbëd̄ gë wahi wale hnuru hnë vák rëhw mën ŷi do gë wayul sanu mbëd̄ gë wahi wahwëhn walampu: wamol mbëd̄ gë wahi wï wamëleka vacery sali mbëd̄ gë vaki vi ye, do gë wayul mbëd̄ gë wahi wahwëhn lampu wã, vacery sali mbëd̄ gë vaki vi ye.»

## 2

*Soŋe ile kerëhnëkëhni San vacery sali mbëd gë vaki*

*Soŋe acery sali mbë Efes*

<sup>1</sup> «Kerëhnëryehna mëleka acery sali mbë Efes ŋa:

«Wëli wante ntehnëk ŋa ale wënkëk wahol mbëd gë wahi hnë vák rëhw lëwu do yasëd fagant hnë wayul sanu mbëd gë wahi wahwëhn walampu wã:

<sup>2</sup> Njëtëbu vantiyehn hun va, ikamëna hun ŋa do gë iduñëna hun ŋa. Njëtëbu kodiluhna aryuñënanëhnuni vële lid wëh va, njëkëhnahnërunëhëhni vële wëcad wëfayik wok vëyena paryi va do tëkatërun vëwër ye.

<sup>3</sup> Nduñënarun, korotërun soŋe wãc mën wã do cilëtaluhna.

<sup>4</sup> «Bare nke ile surëdëmu: goluhna aŋanduno gë kobëri ka.

<sup>5</sup> Awa, dënkwëtaryin le njojërun hna, gwëcëtaryin vankeya va do avokanu anjasa ndënkwëryënkwa hun ŋa. Ge ŋwëjërërun gwëcëtaðiluhna vankeya va, njiryidëfu ŋal hun hna do ntihëtëdëfu wayul walampu hun wã.

<sup>6</sup> Bare nkehëhna ile fërënak hnë wühnë: had ami, ñewëdun vënjasa vëva Nikolayit va.

<sup>7</sup> Ale hwëhna vanëf nkwëry wante ntehnëdëhëhni Iyir ŋa vacery sali va. Ale wëkëk a maŋëryanëdëfuhna tok atëh uwám nte ye hnë arayen Wënu hna.»

*Soŋe cery sali mbë Sëmiren*

8 «Kerëhnëryehna mëleka acery sali mbë Sëmirën ña:

«Wëli wante ntehnëk ña ale ye Aryënkwëryënkwa a do Arëkwa ÿa, ale sëmëko do mbokaj wám li:

9 Njëtëbu horot hun ÿa do gë haÿëhnah hun wã, ßare ile ye toña ÿa, mbetarun! Njëtëbu wameh wante nësëdëni vëryampo soje hun ÿa. Vërac ntehnëdëni wasëwif nkeni ßare gena toña: caliña mba Sintani nkeni!

10 Antë ntaku gë horot le ÿad nkewu ÿa. Wëli, Sintani njëkëhnahnëdëhu ntonatëhni vëyabah hnë wuhnë kaso hna, do wafac pëhw horotëdun. Kahnëndaryin hafo hn'icëm hna do njëdadëmu apënkwa imëk, uwám sër wã.

11 Ale hwëhnak vanëf nkwëry wante ntehnëdëhëhni Iyir ña vacery sali va! Ale wëkëk a cëmëdina cëm kigëna ña.»

### *Soje cery sali mbë Perëgam*

12 «Kerëhnëryehna mëleka acery sali mbë Perëgam ña:

«Wëli wante ntehnëk ale hwëhnak sëlame ÿakënik hwëhn wanjëkan waki ña:

13 Njëtëbu hn'ile ntëdërun hna, hn'ile nke inawë Sintani hna nke. Ha, ÿal hun hna ntëdëk Sintani ÿa, ßare nkorun ayawënu uwac mën wã, gwajëluhna ikwëtahn hun ña ÿal mën hna wëla fac le ndawiko Antipas, sede hahnëndak mën a.

14 «Bare nke vile surëdëmu: kwëhnarunëhëhni hnam vahnë vële rëfëd ikarañ Balam inja; nkabëka Balak tëndëhnëhni urënd vëva Isërayel soje tokehnëhni faÿar

fale sënahnik sadëha wamën wawër do nkwapandëni.✧

15 Ýal hun hna fëna, kwëhnarunëhëhni vahnë vële rëfëd ikaranj vëva Nikolayit va.

16 Awa, gwëcëtëryin vankeya hun va! Ge gwëcëtëluhna vankeya hun va tame njiryidëfu gë ýal hun, do mëtaryëdëfuhëhni vahnë vi gë sëlame wës mën ýi.

17 Ale hwëhnak vanëf nkwëry wante ntehnëdëhëhni Iyir ña vacery sali va! Ale wëkëk a njëdadëfuha tok man✧ le soŵik ýa do g'itaka yerah; hnë itaka tac kerik uŵac hasëk ule nkok yëtëna ahnë, ge gena ale hnuýad ýa.»

### *Soñe cery sali mbë Tiyatir*

18 «Kerëhnëryehna mëleka acery sali mbë Tiyatir ña:

«Wëli ile ntehnëk Aju Wënu ña, ale fëtëdëhaŵo vinkër vi had hwëdëh do wapary ña had ryëhwëra vëntëvënt facënik hnë hwëdëh nkehaŵo.

19 Njëtëbu vantiyehn hun va gë injahn hun ña gë ikwëtahn hun ña g'iyoh hun ña g'iduñëna hun ña. Iyoh hun nte yabëk ntëbi mbë kobëri ña.

20 «Bare nke ile surëdëmu: memaýehnëluŵahna asëval a, Yesabel, ale liyak ahnësëhn Wën, tokahni vëyohal mën va ñanëndëdëhëhni nkwapandëni do tokëndëni faýar fale sënahnik sadëha wamën wawër.

---

✧ 2:14 2.14: Vaker 25.1-2 ✧ 2:17 2.17: Icahn 16.32-34

21 Njêdfabuha ampêd soŋe gante kod nkwêcêtahn ankeya ntêwu ŋa, bare ñadîna tav igwafa dêwu ŋa.

22 Soŋe rac ntonêdêfuha hn'ipad, umê gë vële gwafalandëni va, hn'ile korotêdëni dus. Ntidêfu rac ge vëravëna viwêh vile ntidëniho g'asëval arac.

23 Ndawêdêfuhêhni vële rëfêdêha va. Koyëna fop vacery sali va njêtêdëni ami ye ale yêtêd ile yehêhni vankaf hni hna wasakahn hni hna. Alewo-le hnê wuhnê, ile ntik ŷa, sosêdêfuha.

24 «Bare wuhnê vëvê acery sali mbê Tiy-atir, vële wok vërefëna ikaraŋ viyê vahnê, wuhnê vële wok ñëŋaluhna ile macêdëni watêwah wante cowêk Sintani, ntehnêdëmu: dîbëndêdîluhna idîb kawary.

25 Bare yawênëryin ile hwêhnarun ŷa hafo yiryiwu.

26 «Vële wod ndokuŋêhnêndëniho hafo hn'ile tëkwêk hna, vëhni yed vële wêkêk va. Njêdadêfuhêhni imêk hnê wayal hna.

27 «Nawêhnêdënihêhni gë ryoko ryêhwëra: nihêdënihêhni had gante nihêde vapeya intil.✧

28 Inji mêk ndampo fo nke g'inte hnuŷabu gë Rëm mën ŷa. Njêdadêfuhêhni fëna ikol mbê g'acahnêfêd ŋa.

29 Ale hwêhna vanêf nkwëry wante ntehnêdêhêhni Iyir ŋa vacery sali va!»

### 3

#### *Soŋe cery sali mbê Sarêdes*

✧ 2:27 2.27: Wahnêw 2.8-9



1 «Kerëhnëryehna mëleka acery sali mbë Sarëdes ña:

«Wëli ile ntehnëk ale wënkwëk wayir mbëd gë wahi Wënu ña gë wamol mbëd gë wahi wã: “Njëtëbu vantiyehn hun va. Njëtëbu vahnë va ntiyahnëkëhni vëfërën fo worun, bare cëm ña yerun.

2 Kwëtëryin hakili do yawënerëyin ile wok hnë wühnë soje antë cëm kabi kamahnëbu wëla ðoku hun ryampo padëna haryënkW Wën mën hna.

3 Awa dënkwëtaryin wanës Wën wante harañirun do wëryërun ña; yawënerëyin do gwëcëtaryin vankeya va. Age kwëtëluhna hakili, njiryidëfu had ale; yëtëdiluhna hnë wati le njiryidëfu hnanëtu ÿa.

4 Bare nkeni vëryampo Sarëdes hna vële wok vëronkënëna viyi vilëw hni va. Vërac viyerah cudadëni do tëfëlëdëfun g'ami, kabi tëfahnëkëhni rac.

5 Vële wëkëk va vacud vajerah cudadëni; pëhwëcëda muk wamac hni hnë kayëte uwám hna. Tase Rëm mën gë wamëleka wadëwu pëyahndëfu ami hwëhnëkëhni.

6 Ale hwëhnak vanëf nkwëry wante ntehnëdëfhëhni Iyir ña vacery sali va.”»

### *Soje cery sali mbë Filadelëfi*

7 Kerëhnëryehna mëleka acery sali mbë Filadelëfi ña: «Wëli ile ntehnëk Afacah a, ale ye toña ÿa, umë wënkëk sëdëta Ahnaw David ÿa, umë fidëtëd do ahnë kodina mbokary pid, umë fidëd do ahnë kodina pidët:

8 Njëtëbu vantiyehn hun va. Wëli kwëtëhnëmu haryënkw hun rënka fidëtik le nkok kodina pid ahnë. Njëtëbu toye fo kwëhnarun fanka fa, bare njawënërun wanës mën ña do yahëtalunohna alehnu yëtëlungohna.

9 Wëli, njëdadëmuni vahnë vëvë hnë calina mba Sintani, vële lehnëd wasëwif nkeni vi, bare wayena. Ha, ntidëfu njiryini ndëkwëhnëni haryënkw hun, do njavëtëdëni ñahnëmu.

10 Kabi njawënërun wapacëk wanës mën ña, awa ami fëna njawënëdëmu hnë wati horot sankaf le yijëd hnë duniya li fop soje tëjini vële lëdëk nkal vi.

11 Biyëdina njiryidëfu. Yawënëryin ile hwëhnarun ya, soje antë ahnë nuf apënkwe nte fënkwirun kabi mëkërun.

12 Ale wëkëk a, ntidëfuha ryoko sank hnë Cery Cankaf Wën mën hna do bokëdina cahn muk. Kerëdëfuha uwac Wën mën wa do uva inaw Wën mën ña, Yerusalem hasëk, le sëlid g'ambin darël Wën mën hna. Kerëdëfuha fëna uwac hasëk mën wa.

13 Ale hwëhna vanëf nkwëry wante ntehnëdëhëni Iyir ña vacery sali va.»

### *Soje cery sali mbë Lawodise*

14 «Kerëhnëryehna mëleka acery sali mbë Lawodise ña:

«Wëli wante ntehnëk ale wacëde Amina ña, sefe hahnëndak do ye toña ya, ale ye sankaf hnë fop vile ntik Wënu ña:

15 “Njëtëbu vantiyehn hun va: yamëluhna yakëluhna. Bare ñakëndëbu ayamu ma ayaku!

16 Awa, kabi yakëluhna do yamëluhna, fagant fo nkerun, nkurëdëmu.

17 Ntehnëdfun, mbetarun, nuñarun hnapul yabah do ñoñ gojëluhna. Bare yëtëluhna meku, njiwëhnerun, kaÿëhnerun, mëpërun do ñas fo yerun.

18 Soje rac yabahnëdëmu alawu ÿal mën li sanu le facënik hnë hwëdëh ÿi, soje avetahnu paryi. Dëwaryin fëna viÿi viyerah asufandu, antë mbok cëfëhnu ige ñas fo ña. Dëwaryin kat vëlo soje ayehnahnu vinkër hun vi ahnundu wapacëk.

19 Ami, niradëfuhëhni do catënëdëfuhëhni fop vële ÿahnëbu va. Awa yohëryin, gwëcëtaryin vankeya hun va!

20 Wëli, rënka hna kahnëbu do mbankëdëfu. Age ahnë nkwëryëk kopa mën ÿa do pidët rënka ÿa, tënkedëfu ÿalu hna do tokëlahnëdëfun.

21 Ale wëkëk a ntañëndëdëfuha ðarël mën hnë tinki naw mën hna, had gante mëkëbu ka, ami fëna, do lañantiwu gë Rëm mën ÿa hnë tinki naw lëwu hna.

22 Ale hwëhnak vanëf nkwëry wante ntehnëdëhëhni Iyir ña vacery sali va.”»

## 4

### *Icëmb ña Ambin hna*

1 Ga ndëcëk watac, më hnuhu rënka le fidëtik ambin hna. Kopa ryënkweyënkwe le wëryëbuho hnësëhnëdëhoŵo had lënkwe ÿa, më ntehnëko: «Kayi ani, rufi ile rëfëka tëki haryënkwe ÿa.»

<sup>2</sup> Iyir Ipacah ɲa tēnkēlehno taɲ. Hnulehnu nkeho tinki ahnaŵ mbin hna, do hnē tinki ahnaŵ tac ahnē lañako.

<sup>3</sup> Ale lañako ŷa pētēdēho had wēraka wanēfak, wale ŵacik jasēp gē sarēdēwan. Tinki ahnaŵ ŷa icar ulaŵ hwērēkaŵo nte fētēd had itaka nte ŵacik emerod.

<sup>4</sup> Caharaḅ hnē tinki ahnaŵ tac, watinki ahnaŵ wafēhw wahi gē wahnah (24) yeho. Hnē watinki ahnaŵ watac, vicēr wafēhw wahi gē vēhnah (24) lañako. Viŷi viyah cuḑaniho, do pēnkwanī vapēnkŵ sanu ahnaŵ.

<sup>5</sup> Tinki ahnaŵ hna cahnidēho wabilēbil do wakopa do gē waparāt. Haryēnkŵ tinki hna warēh lampu mbēd gē wahi fētēdēho: wayir mbēd gē wahi Wēnu ɲa yeho.

<sup>6</sup> Haryēnkŵ tinki ahnaŵ hna nkeho had wov lancah, le wētēlēk gē ancēka.

Darēl tinki ahnaŵ hna caharaḅ, nkeniho wulaŵ wahnah wale hwēhnak kore vinkēr haryēnkŵ gē kamēhni.

<sup>7</sup> Ntaŵ dēnkŵeryēnkŵ ɲa gē vēsēhn mētēlēniho, kigēna ɲa gē fēndahni mētēlēniho, tarēna ɲa yēka ahnē kwēhnako do inahēna ɲa gē jaro nte wayēd yaɲ mētēlēniho.

<sup>8</sup> Wulaŵ wahnah ŵa, ntaŵ-wo-ntaŵ, vampaŵ imbēd g'andaŵ kwēhnako, do kore vinkēr kwēhnaniho yaɲ gē gēd per. G'anent gē g'umēd njeŵēdēniho kwēlēkwēl:

«Pacēru! Pacēru! Pacēru!

Ahwēhn, Wēn Hwēhn Fanka Fop,

wējē ale yeho, ye do yijēd!»

<sup>9</sup> Do nte-wo-nte njëwëdëniho wulaŵ wahnah  
wã icëmb g'untënah do g'icamehn soje ale lañak  
hnë tinki ahnaŵ ÿa, Ale yënëd avë kantëm a,

<sup>10</sup> vicër wafëhw wahi gë vëhnaŵ va (24)  
ndënkwehndëniho haryënkŵ hnë ale lañak  
tinki ahnaŵ ÿa, cëmbëdënihawo Ale yënëd avë  
kantëm a, ntonëdëniho vapënkŵ sanu vantëw  
hni va, ntehnatëndëni:

<sup>11</sup> «Ahwëhn, Wën fu, tëfëki ahnuÿa  
icëmb inja g'untënah ña do gë fanka fa,  
kabi wëjë lik fop,  
wëjë ÿadëho nke koyëna rac, nkelehn.»

## 5

### *Kayëte ña gë Fape fa*

<sup>1</sup> Tac më hnuŵu hnë vák rëhw ale lañako hnë  
tinki ahnaŵ hna kayëte nte fëÿik, keru bambery  
gë ipër per do ñamëndëlehni gë wuya wahwënta  
mbëd gë wahi.

<sup>2</sup> Tac më hnuŵuha mëleka hwëhn fanka le rëy  
gë kopa sankaf: «Mo tëfahnëk nke aÿamët ile  
ÿamëndëlehnik ÿi do pëÿët kayëte ñi?» <sup>3</sup> Wëla  
aryampo gelohna mbin hna, nkal li ma kwëÿët  
nkal li janama hna, ale holëko pëÿët kayëte ña,  
njëk ile herik bambery ÿa.

<sup>4</sup> Do rac koyëhnëdëho ðus kabi ahnë gena ale  
rëfëkawo nke afëÿët kayëte ña, njëk bambery.

<sup>5</sup> Awa aryampo hnë vicër hna më ntehnëko:  
«Boka ho! Yëkëryehna, ivësëhn vë hnënk Yuŵa  
ÿa,✧ ale hnagik hnë hnënk Ahnaŵ a David,

✧ 5:5 5.5: Wapëgwala 49.9

umë ale wëkëk a lihëtëd ile ÿamëndëlehnik kayëte ña do fëÿëtëd.»

<sup>6</sup> Tac më hnuÿuha Fape ga kahnëk fagant tinki ahnaŵ, kwëratëniha wulaŵ wahnah do gë vicër. Mëntëko had kácik. Wamiry imbëd gë waki kwëhnako gë vinkër mbëd gë viki, vinte ye wayir mbëd gë vaki Wën vinte sañëtik hnë nkal hna fop.

<sup>7</sup> Fape fa pëñako soñe tebahn kayëte hnë vák rëhw ale lañako hnë tinki ahnaŵ hna.

<sup>8</sup> Ante tebak kayëte ña, wulaŵ wahnah ŵa gë vicër wafëhw wahi gë vëhnah va (24) njonihò nkal hna haryënkŵ lëŵu. Ale-wo-le hnë vëhni itëmp mënkŵëko do gë vañërya sanu tëmpah idud, inte yeho wayëfa vëfacah wale hayëndadëho g'ambin.

<sup>9</sup> Hnëŵ hasëk njëwëdëniho:

«Tëfëki ahnuÿa kayëte ñi,  
 ayamët ile ÿamëndëlehnik ÿa,

kabi káciruhò,

do ntaŵëtëruhëhni soñe Wënu ña,

vahnë hnë wahnënk hna fop

gë vanësa hna fop gë wabulunda hna fop

do gë wayal hna fop;

gë sat hu ÿa,

<sup>10</sup> ntiruhëhni inaŵ vësëna wasadëha Wën fu ña,  
 do naŵëdëni nkal li.»

<sup>11</sup> Tac më yëkëbu do wëryëbu kopa wamëleka wayabah, wawuli wawuli, kodëlohna ndëkwini. Caharaß tinki ahnaŵ hna, wulaŵ ŵuhnah hna do gë vicër hna kahnëniho.

<sup>12</sup> Njëwëdëniho gë kopa sankaf:

«Fape fante haciko fa,

umë ye ale rëfëka nuÿa fanka fa, gë hnapul  
ÿa, g'uyët wã, g'imëk inja,  
g'untënah ña, gë icëmb ña do gë cëkwary  
ña.»

<sup>13</sup> Do nkwëryëdëfuhëhniwo fëna fop vile ntik  
Wën va ambin hna, gë nkal hna, gë kwëyët nkal  
li janáma hna, gë wov hna do gë fop le yehëhna  
hnam ÿa, ga ntehnëdëni:

«Ale lañak tinki ahnaÿ ÿa gë Fape fa nke  
icëkwary, g'idënën, g'icëmb  
do gë fanka, kwëlëkwël!»

<sup>14</sup> Do wulaÿ wahnah wã ntehnëdëniho: «Am-  
ina!» Do vicër va njonihho nkal li soje  
cëmbahnënihëhni Ale lañak tinki ahnaÿ ÿa gë  
Fape fa.

## 6

### *Soje ipëyët kayëte*

#### *Soje ñamëndëlehn idënkwëryënk*

<sup>1</sup> Awa, nubuha Fape fa ga nihëk ñamëndëlehn  
dënkwëryënk hñë mbëd gë wahi hna,  
wëryëlehnëwã intaw dënkwëryënk hñë  
wahnah hna ga ndekad had farat, nësatënd:  
«Yij!»

<sup>2</sup> Hnulehnëwã ipahnac yerah. Ale hayëkawo  
ÿa uñwary mënkweko. Më njëdayik apënk  
vëwëk, ték nke awëk do njilehn mbok mëk kat.

#### *Kigëna*

<sup>3</sup> Ga nihëk ñamëndëlehn kigëna ña,  
wëryëlehnëwã intaw kigëna ña ga ndekad,  
nësatënd: «Yij!»

<sup>4</sup> Hnulehnëwã pahnac kawary bëntah had hwëdëh. Ale hayëkawo ÿa hnuÿako imëk soje ntihët yam ÿa nkal li, soje ndawëlahnëndëni vahnë. Më njëdfayik sëlame sankaf, njilehn.

### *Tarëna*

<sup>5</sup> Ga nihëk ñamëndëlehn tarëna ña, wëryëlehnëwã intawë itarëna ña ga ndekad, nësatënd: «Yij!» Hnulehnëwã pahnac bahnah. Ale hayëkawo ÿa ile yanande mënkwëko.

<sup>6</sup> Wëryëlehnü had kopa fagant wulawë wahnah hna ga nësëd: «Ile ryokuñahnik fac ryampo ÿa, yanjeh vantimp fo ntawahnëd, ile ryokuñahnik fac ryampo ÿa wayanjeh warar vëmalu fo ntawahnëk. Ge wagu ña ye, g'uñen uña, nko koyëna.»

### *Nahëna*

<sup>7</sup> Ga nihëk ñamëndëlehn nahëna ña, wëryëlehnëwã ntawë nahëna ña ga ndekad, nësatënd: «Yij!»

<sup>8</sup> Hnulehnëwã pahnac ðunënkah. Ale hayëkawo ÿa, Icëm maciko, do yëwã vësëm ÿa rëfëlehnëdëhawo. Njëdfayiniho mëk inja hnë sah ryampo hnë wasah wahnah ðuniÿa li, soje ndawënihëhni vahnë va gë sëlame ÿa, gë inte ña, gë wates ña do gë wulawë wuyapah wã.

### *Bëryëna*

<sup>9</sup> Ga nihëk ñamëndëlehn bëryëna ña hnulehnüwëhni, kwëyët le cënade sadëha hna, walawary vële ryawëko soje ikahnënda dëwë hni ña wanës Wën do kabi wasefe lëwü nkeniho.



<sup>10</sup> Ndekadëniho ðus: «Wëjë, Ahwëhn a, ale ye Afacah a, ale ye toña ÿa, hafo guve napëdfu ahitiñëhni vahnë vëvë nkal vi awëcagëhni soje sat fu le ndehëtëni ÿi?

<sup>11</sup> Awa më njëdayini ale-wo-le acud jerah canka, tac ntehnini nduñënani toye, hafo padëni fop vële ryokuñëhnëdfëha Wën va, rëfëka ndawïni had gë vëhni ka.»

### *Kwëhn mbëd gë ryaŵ*

<sup>12</sup> Ga nihëk ñamëndëlehn ikwëhn mbëd gë ryaŵ ña, inkal ña ñënkako ðus gë fanka, hnulehnu ulav ŵa mbahnëlehn had wayëhn do ulepera ŵa mbëntëlehn had wasat.

<sup>13</sup> Wahol ŵa njolehni nkal li, had gante njojëd wanuÿ ka ge sël sankaf ÿa ñënkëka.

<sup>14</sup> Ambin ña më njik had kayëte fëÿëde, do fop wahuÿ ŵa gë watinti ña kërëniko hn'ile nkeho hna.

<sup>15</sup> Wati rac, vëhnaŵ vëvë nkal vi, gë wakamari ña, gë vësankaf wasodade ŵa, gë vëvetak va, gë vëhwëhn fanka va, gë vëramp va do gë vahnë vële ye afaya va, fop coŵaniho hnë wakary hna do gë hnë wëraka wahuÿ hna.

<sup>16</sup> Ntehnëdënihëhniwo wahuÿ ŵa gë wëraka ŵa: «Yohahninëfu, do coŵëryinëfu ñawët yëka ale lañak hnë tinki ahnaŵ aÿi do gë antavah Fape ña!

<sup>17</sup> Fac sankaf ntavah ntëŵ hni ña tëkik: mo hod mëkanti?»

## 7

### *Bulunda gë yavëta Wën*

<sup>1</sup> Ga ndëcëk rac, më hnuhuhëhni wamëleka wanah ga kahnëni hnë wahëf wahnah wavë nkal wï. Pëlani wasël wahnah wavë nkal wï, soñe sël ÿa antë mbok cël nkal li, wov hna do fëna wëla hnë atëh ndampo.

<sup>2</sup> Do më hnuhuha mëleka hawãry ga kayëf gë cape pëhna lav. Mënkwëko ile lihande iyavëta mba Wën paryi. Ndekandëhëhni dus wamëleka wanah wante yëdayiko imëk mbëvehnëni nkal inji gë wov ÿi:

<sup>3</sup> «Antë avëvehnu nkal inji, wov ÿi, vatëh vi, hafo lifuni yavëta wayëka hna vëyohal Wën va.»

<sup>4</sup> Tac nkwëryëbu vahnë vële hnuÿak yavëta ÿa tëkëni wawuli keme gë wafëhw wahnah gë vënah (144,000). Vëhni wahnënk vijë Isërayel hna fop matiniho:

<sup>5</sup> hnë hnënk Yuda hna: vahnë wawuli pëhw gë vëhi (12,000) liyiko yavëta ÿa;

hnë hnënk Riben hna: vahnë wawuli pëhw gë vëhi (12,000);

hnë hnënk Gad hna: vahnë wawuli pëhw gë vëhi (12,000);

<sup>6</sup> hnë hnënk Aser hna, vahnë wawuli pëhw gë vëhi (12,000);

hnë hnënk Nefëtali hna, vahnë wawuli pëhw gë vëhi (12,000);

hnë hnënk Manase hna, vahnë wawuli pëhw gë vëhi (12,000);

<sup>7</sup> hnë hnënk Simeÿo hna, vahnë wawuli pëhw gë vëhi (12,000);

hnë hnënk Levi hna, vahnë wawuli pëhw gë vëhi (12,000);

hnë hnënk Isakar hna, vahnë wawuli pëhw gë  
 vëhi (12,000);  
<sup>8</sup> hnë hnënk Sabilon hna, vahnë wawuli pëhw gë  
 vëhi (12,000);  
 hnë hnënk Yosef hna, vahnë wawuli pëhw gë  
 vëhi (12,000);  
 hnë hnënk Besame hna, vahnë wawuli pëhw gë  
 vëhi ntiyiniho yavëta (12,000).

*Wabulunda mbin hna*

<sup>9</sup> Ga ndëcëk rac, më hnuɓuhëhni kore vahnë  
 vële wok kodena ndëkwini. Vahnë vëvë wayal  
 fop yeho gë wahnënk wã fop gë wabulunda ɲa  
 fop do gë vanësa va fop. Haryënkw tinki ahnaŵ  
 hna kahnëniho do gë haryënkw Fape fa, viyi  
 viyah ntiyaniho do mënkwëni waryund.

<sup>10</sup> Ndekadëniho ðus:

«Ipeh ɲa hnë Wën fu, le lañak hnë tinki ahnaŵ  
 hna, matik do gë Fape hna.»

<sup>11</sup> Wamëleka ɲa fop caharaɓ tinki ahnaŵ hna  
 kahnëniho, gë vicër va do gë wulaŵ wahnah  
 wã. Ga nkwëryëdëniho ile nësëdëniho vahnë  
 yã, ndëkwëhnëdëniho hafo wayëka wã ñak nkal  
 ɲa do cëmbëdënihawo Wënu ɲa.

<sup>12</sup> Ntehnëdëniho: «Amina! Arabi idëwan ɲa, gë  
 icëmb ɲa, g'usery wã, g'icamehn ɲa, g'untënah  
 ɲa, g'imëk ɲa do gë fanka fa kwëhn Wën fu ɲa  
 kantëm! Amina.»

<sup>13</sup> Awa, acër aryampo më tëyëko: «Vële liyak  
 viyi viyah vi, vëhni mo ye do ne matini?»

<sup>14</sup> Më lëkwabuha: «Ahwëhn mën, njëtëru!»

Tac më ntehnëko: «Vële wãtik horot sankaf va  
 ye. Ndagëni viyi vilëw hni va do njerënëni hnë  
 sat Fape hna.

15 Soje rac nkeni haryënkw tinki Wën hna do ndokunëhnëdëniha g'anent gë g'umëf Cery Cankaf ntëwu hna. Ale lañak hnë tinki ya keryëdëhëhni.

16 Bokëdina njohni inte, bokëdina njohni wënka, do ulav wa bokëdina njahni, ma yakah hawary,

17 kabi Fape fante ye tinki ahnañ hna yed ahekery alëw hni ya, do njiryeryëdëhëhni gë wahayalin wënka uwám ka. Do Wënu na pëhwëcëdëhëhni fop wankwën na vinkër vidëw hni hna.»

## 8

### *Soje ñamëndëlehn ikwëhn imbëf gë wahi*

1 Fape fa, ga nihëk ñamëndëlehn kayëte ikwëhn mbëf gë wahi na, ambin na ndemëhnahehn mpëd.

### *Soje walënkw mbëf gë wahi*

2 Tac më hnuhëhni wamëleka mbëf gë wahi hahnëko haryënkw Wën hna; walënkw mbëf gë wahi njëdayiniho.

3 Mëleka hawary më njijëk ñëw haryënkw le cënade sadëha hna; ile fëfande iduf mënkweko, gë sanu ntiyiko. Më njëdayik duf yabah soje pëf hn'ile ntide sadëha hna gante kayahnëd hwëcic ha gë wayëfa vëfacah va fop g'ambin. Hn'ile ntide sadëha hna, gë sanu ntiyiko do haryënkw tinki ahnañ hna nke.

4 Hwëcic iduf na gë wayëfa vëfacah na hnë wák mëleka hna matëko kay hafo Wën hna.

<sup>5</sup> Tac mëleka ÿa më nufëk ile fëdande iduf ña, pëbënëk hwëdëh hn'ile cënade sadëha hna, ntonj duniÿa hna. Awa pëgwëlehn tañ wakopa waparar, wakopa, wabilëbil, do nkal iña ñënkalehn.

<sup>6</sup> Wamëleka mbëd gë waki wante wënkëko walënkw mbëd gë wahi ña pëhwëtalehnëni soñe ntënkweni.

### *Soñe icël lënkw ryënkwëryënkw*

<sup>7</sup> Mëleka ryënkwëryënkw ÿa cëlëko lënkw lëwu ÿa: wënkwa wagurye gë hwëdëh, hna wëlëk gë sat, ndehëtik duniÿa hna. Cape ndampo hnë vatar duniÿa hna ñagëko, do tëh ndampo hnë vatar vante ye duniÿa hna fëna ñagëko do fop idël ña ñagëko.

### *Soñe icël lënkw higëna*

<sup>8</sup> Mëleka higëna ÿa cëlëko lënkw lëwu ÿa: ile wëntëlëk g'ikunj icankaf nte ÿagëd lonjik wov hna. Cape ndampo hnë vacape vatar wov hna mbacako wasat,

<sup>9</sup> sah ryampo hnë wasah warar le-wo-le yënëd wov hna mbëvehniko. Do hnë fop wakulu wavë duniÿa wï, sah ryampo hnë warar hna mbëvehniko.

### *Soñe icël lënkw rarëna*

<sup>10</sup> Mëleka rarëna ÿa cëlëko lënkw ÿa: më njojëk g'ambin ikol cankaf nte ÿagëdëho had hwëdëh hucankaf. Sah ryampo hnë wasah warar wasën wasankaf hna fop do hnë wahayalin hna fop njojëko kol iña.

11 Ikol tac, Wunkah maciko. Wënka wante njohahnëko ña mbacako wunkah do vëyabah cëmëniho kabi wënka watac ceniho.

### *Soje icël lënkw nahëna*

12 Mëleka hnahëna ÿa cëlëko lënkw ÿa: cape ndampo hnë vacape vatar lav hna ndafiko gë cape ndampo hnë vatar lepera hna do gë kol ndampo hnë wamol warar hna, soje antë nkor-yary idanc dëwu ña. Koyëna, fac ÿa nkoryeryina idanc dëwu ña do umëd ña fëna.

13 Awa tac më hnuhuha do wëryëbuha jaro nte wayëdëho yañ do ryekadëho dus: Kata! Kata! Kata fëladëhëhni vële lëdëk nkal vi soje wamëleka watar wañëntaŵ wante fëhwëtaf cëlëni walënkw walëw hni wä!

## 9

### *Soje icël lënkw vëryëna*

1 Mëleka vëryëna ÿa cëlëko lënkw ÿa: më hnuhu ikol ga njojëko nkal li mati g'ambin. Ikol ña njëdayik sëdëta hatëh hatëwah.

2 Ikol ña më pidëtëk rënka vë hnam ÿa do hwëcic cahnëlehni had hwëcic nkula cankaf. Rac huyëndanëk ulav wä g'ambin ña fop.

3 Do hnë hwëcic hutac cahnëdëniho vampul campëndëni nkal li. Njëdayiniho imëk ile wëntëlëk g'imëk wafawëry wä.

4 Mbañëhniniho antë përekanëni idël mbë nkal ñi, ma vatëh, ma vatëh rëhël vi. Tëfëkëhni tonihëhni vahnë vële wok vëliyina yavëta Wën fo hnë wayëka walëw hni hna.

5 Vëwawëryanilohna ndawënihëhni, bare koro-tehnënihëhni hnë wadepera imbëd. Horot

le ntidënihëhniwo ŷa mëntëlëko had gante ko-rotehnëd ito fawëry ka.

<sup>6</sup> Hnë wafac warac vahnë va njëkëlehnëdëni icëm ña bare vëhnuđina. Përedëhëhni cëmëni, bare icëm ña ñawëtađëhëhni.

<sup>7</sup> Vampul va gë wafahnac wale fëhwëtak uwët mëntëlëniho. Inë le ye had apënkwa sanu ahnaŵ yehëhniwo vankaf hna, do wayëka walëŵ hni ŵa had wëva vahnë nkehëhniwo.

<sup>8</sup> Imul dëŵ hni ña had iba vësëval nkehëhniwo, do wabeñ wadëŵ hni ña had wëba wabësëhn nkehëhniwo.

<sup>9</sup> Wasakahn walëŵ hni ŵa had wajand waryëhwëra ntiyani nkehëhniwo, do wëñaŵ vampaŵ vantëŵ hni va had wëñaŵ saret hwëhn wafahnac wayabah wale yaryëd gë uwët nkeho.

<sup>10</sup> Wasavët ŵa had wafawëry nkehëhniwo g'ile tohahnëdëni. Hnë wasavët walëŵ hni hna nkeho fanka falëŵ hni fale koroteyehnañdënihëhniwo vahnë hnë wadepera mbëd hna.

<sup>11</sup> Ahnaŵ alëŵ hni ŷa, mëleka hatëh hatëŵah yeho. Uwac lëŵu gë Wa-ebëre ña Abadon yeho, do gë wagërek ña, Apoliŷo, umë fëhnëtanëk Avëvehn.

<sup>12</sup> Kata ryënkwerëyënkwa ŷa ndëcëk. Wëli, wakata waki vokëd tëki.

### *Soŷe icël lënkwa hwëhn mbëd gë ryaw*

<sup>13</sup> Mëleka hwëhn mbëd gë ryaw ŷa cëlëko lënkwa ŷa: më wëryëbu kopa le ŵatiko hnë wamiry wahnah wavë tabali sanu hn'ile cënađe sadëha hna, ile yeho haryënkwa Wënu ña.

14 Ntehnëdëhaŵo mëleka hwëhn mbëd gë ryaw̃ le wënkëko lënkŵ ŷa: «Pëtëryihni wamëleka wanah wante ŷabik vambëŋ sën sankaf le wãcëde Efërat.»

15 Awa wamëleka wanah wante fëhwëtako soŋe wati ŷa, gë fac ŷa, gë lepera ŷa do gë bëhn ŷa, pëtiniho soŋe ndawëniha aryampo hnë vërar hna.

16 Nkwëryëbu ga ntehnëde, wasofade wahwëhn wafahnac wã, wawuli wuli wakeme waki nkeniho (200,000,000).

17 Awa nubuhëniwo wafahnac wã gë vële hayëkëniwo va: cudaniho wayand waryëhwëra wavëntah had hwëdëh, bulu do yalëwaye. Vankaf wafahnac wã had vankaf wabësëhn nkeho. Hwëdëh nkusëdëniho gë hwëcic do gë vëd le fëdëd.

18 Aryampo hnë vahnë vërar hna mbëvëko gë hwëdëh, gë hwëcic do gë ivëd le fëdëd.

19 Fanka wafahnac wã hnë wawës walëw̃ hni hna nkeho do gë wasavët walëw̃ hni hna; wasavët walëw̃ hni wã gë walën mëntëlëni, kwëhna vankaf do gë rac mbërehnahnëdëni.

20 Vahnë vële woko vëvëvëna va, vëravëlohna icëmb wayine ŋa gë vile përeni gë wëbák wadëw̃ hni: wamën wamër sanu, gë koryi, gë waryëhwëra, gë wëraka, do gë wadëhwa; wamën wale wok kodina nu ma nkwëry ma njas.

21 Fëna vëravëlohna idaw̃ vahnë, gë kavëla ntëw̃ hni ŋa, gë ndakëntal meh ntëw̃ hni ŋa do gë ule lëw̃ hni wã.



*Mëleka ÿa gë fëkayëte fapëÿik fa*

<sup>1</sup> Më hnuÿuha mëleka haÿary hwëhn fanka sëlidëho g'ambin. Anjar fëryëkawo do car ulawë yehawo yañ nkaf ntëÿu hna; yëka lëÿu ÿa had ulav nkehaÿo, do wapary wadëÿu ña had sahnunt hwëdëh nkehaÿo.

<sup>2</sup> Fëkayëte fante fidëtik mënkweko. Tindëko fary rëhw lëÿu ÿa wov hna do rahahn ÿa nkal hna,

<sup>3</sup> tac ndeka gë fanka, had vësëhn ÿërëlak. Ga ndekak, waparar mbëd gë waki ÿëmëko.

<sup>4</sup> Ga ñëmëk waparar mbëd gë wahi ÿa, ñadëfuho heru, bare kopa wëryëÿuho g'ambin ga ntehnëdëho: «Antë aher ile ñëmëk waparar mbëd gë wahi ÿi, tavëry coÿa.»

<sup>5</sup> Tac mëleka le hnuÿuho ga tindëko fary rëhw lëÿu wov hna do rahahn ÿa nkal hna, më njelëk vák rëhw lëÿu ÿa g'ambin,

<sup>6</sup> më ntëkëk g'uÿac ale ye kwëlëkwël ÿa, ale lik ambin gë ile ye hnam ÿa fop, gë nkal inja gë le ye hnam ÿa fop, gë wov ÿa gë le ye hnam ÿa fop ntehn: «Ñoñ bokëdena napi:

<sup>7</sup> hale ntënkwe'd mëleka hwëhn mbëd gë waki ÿa lënkwe lëÿu ÿa, awa Wënu ña padënëd viÿë visiyamah, gante pëyakëhniÿo ka vëyohal vëlëÿu wakila ña.»

<sup>8</sup> Do kopa le wëryëÿuho ga nësëhniëdëho g'ambin ÿa mboko nësëhne kat: «Yiry ahnuf kayëte nte fidëtik hnë vák mëleka le rindëk fary ryampo hnë wov do ÿëntaÿ ÿa nkal hna.»

<sup>9</sup> Gë vëhni mëleka njidëfuho rëyëÿa njëdawo fëkayëte fa. Më ntehnëko: «Tëbary do tokëry.

Nkunkëd donk hu hna bare wës hu hna ntëmëd had wadëj.»

<sup>10</sup> Më rebabu fëkayëte fa hnë vák mëleka hna do rokëbu. Wës mën hna ntëmëko had wadëj, bare ga kohnëbu nkunkëko donk mën hna.

<sup>11</sup> Tac më lehnibu: «Afo avok afëyahn ile pëhnanëhnëkëhni Wënu ña wabulunda wayabah, gë wayal wayabah, gë vanësa vajabah do gë vëhnañ vëyabah.»

## 11

### *Wasede wahi ña*

<sup>1</sup> Tac ahnë më njëdako uriry le ÿañande, do nteho: «Yiry añañ Cery Wën Cankaf ñi gë hn'ile cënade sadëha hna do dëkwëryihni vële sëmbëdëha Wënu ña hnam.

<sup>2</sup> Bare selele vë pë Cery ÿa, tavëry, antë añañ, kabi vële wok vëyëtëlahna Wën va mañwëryanëdëni nkëñëni nkol nañ cëvah ña hnë wadepëra wafëhw wahnah gë wahi (42).

<sup>3</sup> Mañwëryanëdëfuhëhni wasede wahi mën ña, vële sudak viyi icëm va, imëk pëyahnëndëni wanës Wënu ña hnë wañi wafac wuli gë wakeme waki gë wafëhw mbëd gë ryañ (1,260).»

<sup>4</sup> Wañi wasede wahi ye vatëh oliv vaki va do gë wayul walampu wahi wale ye haryënkwa Ahwëhn nkal ña.

<sup>5</sup> Ge ahnë ñad ntihi uweh, hwëdëh sahnëd wañës walëw hni hna do mbëvehnëdëhëhni vële ÿewëkëhni va. Ha, ale ÿad ntihi wëh ña tëfëka ndañi koyëna.

<sup>6</sup> Wañi wasede wahi kwëhnani imëk soñe pidëni ambin, memañehnahni antë mbok tëv

hnë wati le pëyahnedëni wanës Wën hna fop. Kwëhnani fëna imëk soje nkwëcëtëni wënka ña nke wasat do cëlëndi nkal li sifa uwëh fop, nte-wo-nte ñadëni ña.

<sup>7</sup> Ge puhnani wafac ucedëya ntëw hni ña, intaw yapah ña ndaniɔ hnë hatëh hatëwah hna mëtaryëdëhëhni, mëkëdëhëhni do ndawëdëhëhni.

<sup>8</sup> Do wayas walëw hni wã hnë yëwã bulunda nkol cankaɔ hna nkoɔ, nkol cankaɔ nte ye had Sodom gë Esipët\*, hn'ile pakiko Ahwëhn hni hna dënk nke.

<sup>9</sup> Vahnë hnë wabulunda hna fop, wahnënk hna fop gë vanësa hna fop do gë wayal hna fop nijjëdëni njëkëndëni wayas walëw hni wã hnë wafac warar gë fagant fac, do vëwawëlohna mbañini.

<sup>10</sup> Vëvë ðuniya vi nëjëdëhëhni soje icëm wakila waki watac kabi korotehnënihëhni ðus vële lëdëk nkal vi. Awa natëdëhëhni do nkwëcëtëlëdëni wabuña.

<sup>11</sup> Ga ndëcëk wafac warar gë fagant fac ya, iyën uwám le watik Wën nijj tënkëhni wakila waki ña, matëlehnëni. Awa vële yëkëdëhëhniwo va më ntakëkëhni ðus.

<sup>12</sup> Tac wakila waki ña më nkwëryëni kopa sankaf le watik g'ambin, ga ntehnëdëhëhni: «Kayin ani!» Kayëlehnëni g'ambin, hn'anar, tase vële yëwëkëhni va.

<sup>13</sup> Hnë wati rac dënk, ñënkalehn nkal inja gë fanka, cape ndampo hnë ipëhw naw hna

---

\* **11:8 11:8** *Sodom gë Esipët*: Wënu ña hitijëk vani vacape waki ntëbi wayëntaw wã. (Wapëgwala 19.24-25; Icahn 14.23-28)

njolehn. Vahnë wawuli mbëd gë vëhi cëmëniho hnë iñënka nkal tac. Vële woko va ntakëkëhniwo do ntënëndënihawo Wën hunte ye g'ambin ña.

<sup>14</sup> Kata higëna ÿa ndëcëk. Wëlin kata rarëna ÿa biyëdina tëkid.

*Soje lënkw hwëhn mbëd gë wahi*

<sup>15</sup> Mëleka hwëhn mbëd gë wahi ÿa më ntënkwëk lënkw ÿa: wakopa wacankaf ntehnëdëho ambïn hna:

«Inaŵ mbë duniŷa ñi nke gaki hnë wëbák  
Ahwëhn fu ÿa gë Arëhnayik alëwu ÿa.

Nawëd kwëlëkwël!»

<sup>16</sup> Vicër wafëhw wahi gë vëhna, vële lañako hnë watinki ahnaŵ hna haryënkW Wën hna, ndëkwëhnëniho wayëka ŵa nkal hna do cëmbëdënihawo Wënu ña nësätëndëni:

<sup>17</sup> «Camehnëderu, Ahwëhn Wën Hwëhn Fanka  
Fop,

ale ye do ale yeho,

kabi fanka fasankaf hu fa rufahnëru  
ahahnëndahn inaŵ hu ña.

<sup>18</sup> Wayal ŵa ntavëkëhni,

bare tame ntavah ntëw hu ña rufëhna.

Wati le hitiñahnëdühëhni vësëm va tëkëk

gë le vuñahnëdühëhni vëyohal hu va, wak-  
ila ña,

gë vëfacah va do gë fop vële lënëndë ŵac hu ŵa,  
vëroy gë vëhnaŷah

do gë le vëvehnëdühëhni vële vëvehnëd nkal  
va.»

<sup>19</sup> Do Cery Wën Cankaf g'ambin ña pidëtalehn,  
hnulehnu kwëni akwëtëla ña. Awa nkelehn

wabilëbil, wakopa, waparar, iñënka nkal do gë rëv wagurye wayabah.

## 12

### *Soje wëdahëse mbëd' gë wahi*

#### *Soje Asëval a gë fato fa*

<sup>1</sup> Ga ndëcëk watac, dahëse fëmpëhnahnah sankaf sahnëk ambin hna: asëval yeho ale sudako ulav, ulepera wã wapary hna nkehawo do pënkwo apënkwo ahnaŵ hwëhn wahol pëhw gë vëhi.

<sup>2</sup> Ndonkëko do ndekadëho ulav ðonk hnag wã.

<sup>3</sup> Dahëse haŵary mbok cahnëlehn ambin hna: fato vëntah sankaf yeho le hwëhnako vankaf mbëd' gë vaki gë wamiry ipëhw do gë apënkwo ahnaŵ hnë nkaf-wo-nkaf. <sup>4</sup> Savët lëŵu ŷa pahëcëko sah ryampo hnë wasah warar wahol wavë g'ambin hna ntoni nkal li. Fato fa më kahnëk haryënkwo asëval ale ŷad' nag ŷa, soje kohna fatah fa ge rëk nagi.

<sup>5</sup> Asëval a më nagëka facan, fante hnaŵëndëhëhni do heryëd' wayal wï fop gë ryoko ryëhwëra. Fatah fa njoyiko tan' ðarël Wën hna do gë ðarël tinki unaw' ntëŵu hna.

<sup>6</sup> Awa asëval a nkaryëlehn gë wula, ŷëŵa le pëhwëtëhnekawo Wënu hna, soje pabahna hnam hnë wafac wuli gë wakeme waki gë wafëhw mbëd' gë rywã (1,260).

<sup>7</sup> Tac nkelehn uŵët ambin hna: Misel gë wamëleka wadëŵu ŋa mëtaryënihaŵo fato fa. Fato fa umë fëna mëtaryëdëhëhniŵo gë wamëleka wadëŵu ŋa,

8 ßare fato fa wëkiko, do umë gë wamëleka wadëwu ña ntayiniho ambin hna.

9 Fato fa ntonjiko gë pë; umë ye lën sër ÿa, le wacik Aÿewh vahnë ma Sintani, ale rokad funiÿa fop. Ntonjiko nkal hna, do gë wamëleka wadëwu ña per.

10 Tac më wëryëbu kopa sankaf mbin hna, më lehnëdëho:

«Tame ipeh ña do fanka fa  
do Inawh Wënu fu ña

do gë ucankaf Arëhnayik alëwu ÿa tëkik!  
Fato fa, ale hnësdëho wameh vëÿënta fu va  
haryënkW Wën fu  
g'anent gë g'umëd, ntonjiko ntayiko ambin.

11 Do vëÿënta fu va mëkëniha

gë sat Fape fa  
do gë wanës Wën wante cedeyahnëdëhni  
ña;

vëwëÿëryalohna njëdahnëni uwám walëw hni  
wã, këbënanihho soñe cëmëni.

12 Soñe umë ye natëryiÿi, ambin,

do gë wuhnë vële lëdëk hnam va!

Kata yehu wuhnë, nkal gë wov,  
kabi Sintani cëlëryik ðarël hun.

Antavëka ðus

kabi njëtëk wati le nkoryaryëk ÿa yabëna.»

13 Fato fa, ga kamahnëk ntonjiko g'inkal, më tëfëlendëha asëval ale hnagëkawo facan fa.

14 Bare asëval a më njëdäyik vampañ jaro cankaf va soñe matahn nji gë wula ÿëwã le pëhwëtanëhnik hna, hn'ile pabëdëhna wabëhn watar gë fagant bëhn, ñawët lën\* rac.

\* 12:14 12.14 Lën wacik fëna fato ma Sintani.

<sup>15</sup> Awa lën ÿa më nkurëk wënka wante ye had garyëla hamëhni asëval a, soje wënka ña njohna.

<sup>16</sup> Bare nkal ña ndemakawo asëval a; pidëtako do kohn sën le nkurëko fato fa.

<sup>17</sup> Fato fa ntavëkawo ðus g'asëval a, do më njik mëtaryëhni vutah vuñëntaŵ vumba asëval va, vële ŵawëhnëd vakwëda Wën do sedefyahnëdëha Yesu va.

<sup>18</sup> Tac më kahnëk tëfary wov hna.

## 13

### *Ntaŵ yapah ndampo nte sahnik wov hna*

<sup>1</sup> Awa nubuha ntaŵ yapah ndampo ga cahnid wov hna. Kwëhnako wamiry pëhw gë vankaf mbëd gë vaki. Hnë wïry-wo, apënkŵ ahnaŵ pënkŵako do hn'ankaf-wo nkeho uŵac le yewëdëha Wënu ña.

<sup>2</sup> Intaŵ nte hnuhuho ña gë gërëm mëntëlëniho, wakwër wadëŵu ña njëwëko do kwëhnako wakarehn wayaryah, do wës ÿa had va vësëhn. Fato fa më njëdaka fanka falëŵu fa, tinki ihnaŵ dëŵu ña do g'ucankaf camah.

<sup>3</sup> Ankaf ndampo ntaŵ ntiyako cërëk had cëm, bare tame sër lëŵu ÿa njërëk. Awa ðuniÿa ÿi fop pëmpëhnahnëkawo gë watac do tëtëlehnëniha intaŵ ña.

<sup>4</sup> Vahnë va fato fa cëmbëdëniho kabi intaŵ ña njëdako ucankaf ña do intaŵ ña cëmbëdëniho ntehnëndëni: «Mo këñëlahnëni g'intaw ñi do mo hod mëtarya?»

<sup>5</sup> Intaw̃ ña mawëryaniko soje kol naÿënand do nësënd wante yewëdfëha Wënu ña. Njëdayiko imëk ntind cankaf ntëwu ña soje wadepera wafëhw wahnah gë waki (42).

<sup>6</sup> Nësëdfëho wameh njewënda Wënu ña: uwac Wënu ña njewëdfëho gë ÿëwa le ntëdfahnëk ÿa do gë fop vële lëdfëk ambin va.

<sup>7</sup> Njëdayiko ucankaf soje kol mëtaryëhni vëfacah va do mëkëhni. Njëdayiko ucankaf ña hnë wahnënk fop gë wabulunda hna fop gë vanësa hna fop do gë wayal hna fop.

<sup>8</sup> Fop vële lëdfëko nkal vi, vële woyiko kerina wamac wadëw̃ hni wapëgwa ðuniÿa hna hnë kayëte uwám Fape fante hácik fa, cëmbëdfëniha ntaw̃ ña.

<sup>9</sup> Ge ahnë kwëhnak vanëf, nkwëry!

<sup>10</sup> Ge ahnë tëfëka nke aramp,  
aramp yed;

ge ahnë tëfëka ndawi gë sëlame,  
gë sëlame ndawëde.

Wati ÿa ye le tëfahnëkëhni kwëhnani vëfacah va iduñëna ña do ikwëtahn ña.

### *Ntaw̃ nte sahnik nkal hna*

<sup>11</sup> Tac më vokëbu hnuwa intaw̃ yapah kawary ga cahnid nkal hna. Wamiry waki kwëhnako had fape, bare had fato nësëdfëho.

<sup>12</sup> Kwëhnako fop ucankaf ntaw̃ nte sahniko wov hna do ucankaf tac ndokujahnëdfëho tase ntëwu. Intaw̃ bë nkal ña porosijehnëdfëho nkal ña gë vële lëdfahnëk va njëfandëniha intaw̃ bë wov ña nte yërëniko usër le ryawëdf.



13 Intawñ bë nkal ña ntiko viyë vifëmpëhnahnah ðus afo cëlëndi hwëdëh g'ambin, tase vahnë fop.

14 Gë vifëmpëhnahnah vile mawëryahniko nti tase intawñ bë wov ña tokakëhniwo vële lëdëk nkal va. Më ntehnëkëhni vële lëdëko nkal va mbëryëni ile wëntëlëk g'intawñ bë wov nte sërehniko do vokajëk uwám hna.

15 Njëdayiko fëna imëk njënëndahn ile liyiko mëntëlëni g'intawñ bë wov ña gante kolahnëd nësënd do ndawëhnëndëhni fop vële wok vëyëfadilahna va.

16 Ntiko fëna hafo vahnë va fop, vutoy gë vëhnañah, vëvetak gë vëhañëhnah, vële ye afaya gë vëramp, mawëni ntiyini yavëta vák rëhw hna ma yëka hna.

17 Do ahnë antë kol ntañ ma nkwaf iñë ge kwëhnana yavëta ña, umë ye uñac intawñ bë wov ña ma idëkw nte rëfëlëk gë uñac rac wã.

18 Wati ikwëhna uyët wã ye. Arabi ale hwëhna hakili ña nkwëry ile pëhnëtanëd viñi vidëkw intawñ vi, kabi idëkw tac soñe vahnë va ye, do idëkw tac ye wakeme imbëd gë ryañ gë wafëhw imbëd gë ryañ gë imbëd gë ryañ (666).

## 14

### *Fape fa gë vële ntañëtëk va*

1 Tac nubuha hnë Ikuñ Siño\* hna Fape fa ga kahnëni gë vahnë wawuli keme gë wafëhw

---

\* 14:1 14.1 Siño fakun ye Yerusalem hna hn'ile nke Cery Wën Cankaf hna.

wahnah gë vënah (144,000), vële heriko wãc lëwu gë wac Rëmu hnë wayëka hna.

<sup>2</sup> Do më wëryëbu kopa le wãtik g'ambin yãwëdëho had wavonkëlo wënka wov, had farat sankaf. Kopa le wëryëdëfuho yã mëntëlëniho fëna g'itëmp nte rëmpëde.

<sup>3</sup> Vahnë vërac hnëw hasëk njëwëdëniho haryënk w tinki ahnaw hna gë haryënk wulaw wahnah hna do gë vicër hna. Ahnë kodilohna nëña hnëw rac ge gena vahnë wawuli keme gë wafëhw wahnah gë vënah (144,000), vëhni vële lawëtiko nkal va.

<sup>4</sup> Vële wok vëronkënana gë vësëval va ye, vëyëtëna vësëval. Fape fa tëfëlehnëdëni fop le njid hna. Ntawëtini hnë vahnë hna soje nkeni vëryënk wëryënk vële sënayik had sadëha Wënu ña gë Fape fa.

<sup>5</sup> Kobëri vëwërëna; vëhwëhnana ile niradëni.

### *Ipëyah n kiti*

<sup>6</sup> Tac më hnu buha mëleka hawary nkwayëdëho yañ. Gë Wanës Wakasëk wante wok dëcëdëna, wante rëfëkawo pëyahni vële lëdëk nkal va, njijëk: vahnë hnë wayal hna fop gë wahnënk hna fop gë vanësa hna fop do gë wabulunda hna fop.

<sup>7</sup> Gë kopa sankaf ntehnëk: «Dënënyina Wënu ña do cëmbëryina, kabi wati kitiñ dëwu ña tëkik. Cëmbëryina ale lik ambin gë inkal ni, gë wov yi do gë wahayalin ni.»

<sup>8</sup> Tac, mëleka higëna më tëfika do ntehn: «Njok! Babilon Samah yã njok! Umë ye ale yëdëkëhni wayal wï fop ceni uñen nte

liyehnëdëhëhniwo kwëlëkwël le ñewëk Wënu ña!»

<sup>9</sup> Mëleka rarëna më tëfikëhni waÿëntaŵ ŵa do gë kopa sankaf ntehnëk: «Ge ahnë sëmbëdëha intaŵ ña gë ile liyik mëntëlëni g'umë ÿa, ge nuÿak yavëta ÿa yëka hna ma vák hna,

<sup>10</sup> ced umë fëna uñen antavah Wënu ña, unte hotayik hara cutina gë wënka hnë nkëlëŵa tëmpah ntavah ntëŵu hna. Sifa vahnë vërac korotëdëni ðus hwëdëh hna do gë hn'ivëd le fëdëd hna haryënk wamëleka wapacah hna do gë Fape hna.

<sup>11</sup> Hwëcic hwëdëh hunte horoteyehnëdëhëhni vële sëmbëdëha intaŵ gë ile liyik mëntëlëni ÿa, vële hwëhna yavëta uŵac lëŵu va, cëhnëd kwëlëkwël do vëhwëhnadina iyinëga g'anent g'umëd.»

<sup>12</sup> Wati ÿa ye le tëfahnëkëhni kwëhnani vëfacah va iduñëna ña, mawëhñëni vakwëda vantëŵu va do nko kahnëndani hnë Yesu.

<sup>13</sup> Tac më wëryëbu kopa ga ntehnidëho g'ambin: «Kerëry aki: Mbetani vële ye g'Ahwëhn a hafo cëm hna!»

Iyir Ipacah ña ntehnëk, «Ha, njinëgadëni wadoku wadëŵ hni ña, kabi ile ntini ÿa tëfëlehnëdëhëhni.»

### *Soje ikitiña tékwa*

<sup>14</sup> Ante njëkëdëfuho ña, nubuho añar jah, do hnë ñar tac ale wëntëlëk g'ahnë lañako. Apënk w sanu ahnaŵ pënk wako do mënk w ikáca ñakah.

<sup>15</sup> Tac mëleka haŵary më cahnik Cery Wën Cankaf hna do ndekahna ale yeho hn'anar hna:

«Dokuḡahnëry ikáca hu ɲi ahácahn, kabi uhác vé nkal wã mbëntëk.»

<sup>16</sup> Awa, ale yeho hn'aḡar ÿa më nkwësirëk káca ɲa nkal hna, do uhác vé nkal wã fop káciko.

<sup>17</sup> Tac mëleka haḡary më cahnëgik hnë cery Wën cankaf mbë g'ambin hna; umë fëna ikáca ɲakah mënkweko.

<sup>18</sup> Tac mëleka haḡary kat, le hwëhnako imëk hnë hwëdëh ɲa, më cahnëgik hn'ile cënade sadëha hna do ndekahna ale wënkëko ikáca ɲakah ɲa: «Nufëry ikáca hu ɲi alëpëtah wadëwël atëh resen nkal ɲi, kabi mbëntëk.»

<sup>19</sup> Mëleka ÿa më nkwësirëk ikáca dëwu ɲa nkal li. Më mbarëpëk waresen wavë nkal wï, do ntoḡ ile mbarëpëko ÿa hnë tank camah ntavah Wën hna le ɲwëyëhnëde.

<sup>20</sup> Më ɲwëyëhnik wadëwël ɲa hnë tank camah le ye hamëhni nkol hna; wasat më cahnëk hnë tank camah hna ɲji had uḡac hafo tëk wawës wafahnac hna do campëko hnë wakilometër wakeme watar (300).

## 15

### *Soḡe vahnë vële nkok mëkëna ntaḡ ɲa*

<sup>1</sup> Ga ndëcëk rac, më vokëbu hnuwu ambin hna dahëse haḡary samah do vënak: wamëleka mbëd gë waki wënkëk wëkata wacankaf mbëd gë waki. Waḡi ye watëkwa ɲa kabi gë vëhni padëned ntavah Wënu ɲa.

<sup>2</sup> Më hnuḡu ile ye had wov lancah ile hnaḡëlëk gë hwëdëh, do vële wok vësëmbëlahna ntaḡ ɲa g'ile fëriko mëntëlëni ÿa, gë vële wëyëk yavëta lëwu ÿa, ðarël hnë wov lancah rac

kahnëniho. Warëmp wale njëdakëhniwo Wënu  
 ña mënkwëniho.

<sup>3</sup> Njëwëdëniho hnëw Fape fa gë Moyis, ayohal  
 Wënu ña:

«Ahwëhn Wën Hwëhn Fanka Fop,  
 Vantiyehn hu va camëk do mbënak!

Ahnaŵ wayal,

Vankaŵ hu va catëk do toña ye!

<sup>4</sup> Mo wok dënënëdilihna, Ahwëhn?

Mo wok cëmbëdina uŵac hu ŵa?

Wëjë fo ye afacah.

Fop wayal ŵi njijëdëni do cëmbëdëhnihi,

kabi nuni kitiña hu ña.»

<sup>5</sup> Tac nubu ambin Acery Wën Cankaf, rac ye  
 usank<sup>☆</sup> ule ryënkwëtehnëdëho kwëtëla ña, ga  
 pidëtak,

<sup>6</sup> do wamëleka mbëd gë waki ña wante  
 wënkëko wakata mbëd gë waki cahnañëni  
 hnam. Vacud vacankaf vapacah vanjerah vante  
 fëtëd vante rëkëdëhëniwo hafo wapary hna  
 cudaniho do ñëbani waryil sanu wayankah  
 wasakahn walëw hni hna.

<sup>7</sup> Ryampo hnë wëlaŵ wahnah hna  
 njëdakëniwo wamëleka mbëd gë waki ñi  
 ñërya sanu nte rëmpëhnik untavah Wën ale  
 wok kantëm.

<sup>8</sup> Idanc Wënu ña do gë fanka falëwu fa  
 pëbënëko Cery ñi gë hwëcic. Ahnë kodilohna  
 tënk hnam hafo pad wakata mbëd gë waki mba  
 wamëleka mbëd gë waki ñi.

☆ 15:5 15.5: Vantiyehn 7.44

## 16

### *Soje wakata mbëd gë waki ña*

<sup>1</sup> Ga ndëcëk watac, nkwëryëbu kopa sankaf hnë Cery Wën, le lehnëdëhëhniwo wamëleka mbëd gë waki ñi: «Yïryin do campehnëryin fop nkal li vañërya mbëd gë waki ntavah mba Wën.»

### *Kata ryënkwëryënkw*

<sup>2</sup> Aryënkwëryënkw a njik campehn ñërya ntëwu ña nkal hna: wahajën wañeh do walavah ryafëkëhniwo vahnë vële hwëhnako dahëse ntaŵ yapah do sëmbëdëho ile liyiko mëntëlëni g'umë ÿa.

### *Kata higëna*

<sup>3</sup> Ahigëna ÿa campehnëk ñërya ntëwu ña wov hna: wënka ña mbacalehn had sat asëm, do fop vile yehëhna wov hna hwëhnak sël uwám wã cëmëni.

### *Kata rarëna*

<sup>4</sup> Ararëna ÿa campehnëk ñërya ntëwu ña hnë garyëla hna do wahayalin hna: wënka mbacalehn sat.

<sup>5</sup> Do nkwëryëbuha mëleka le hwëhnako imëk hnë wënka ga ntehnëd:

«Catëru, wëjë ale ye do yeho,  
kabi wakiti wante liru ña acatëk;

<sup>6</sup> Vahnë va campehnëni sat vëfacah do wakila,  
sat ye fëna ile yëdaruhëhni ceni.

Rac sanjëkëhni!»

<sup>7</sup> Do nkwëryëbu kopa le wãtik hn'ile cënafe sadëha hna ga ntëkwad:

«Ha, Ahwëhn Wën Hwëhn Fanka Fop, wakiti wadëw̃ hu ña pëbëka toña do usatah.»

### *Kata hnahëna*

<sup>8</sup> Ahnahëna ÿa campehnëk ñërya ntëw̃u ña lav hna, do maŵëryanik pëdëni vahnë va gë hwëdëh lëw̃u w̃a.

<sup>9</sup> Vahnë va pëdëlehnini gë uyakah samah; njewëdëni uŵac Wënu ña ale hwëhna uŵëka hnë wañi wakata, bare vēwëcëtana vankeya vantëw̃ hni soñe cëmbahnëniha.

### *Kata vëryëna*

<sup>10</sup> Avëryëna ÿa campehnëk ñërya ntëw̃u ña hn'itinki naŵ ntaŵ yapah hna: inaw̃ ntëw̃u ña pëbëlehna umëhwëry. Vahnë va ñëradëniho ryëw̃ ÿa kabi korotëdëniho d̃us;

<sup>11</sup> njewëdëniha Wën mbë ambin ña soñe wahorot walëw̃ hni w̃i do soñe vañag vantëw̃ hni vi, bare vēwëcëtana vankeya vantëw̃ hni vi.

### *Kata hwëhn mbëd g'iryaw̃*

<sup>12</sup> Ahwëhn mbëd gë aryaw̃ a campehnëk ñërya ntëw̃u ña hnë sën sankaf le ŵacik Efërat: wënka ña më nkuhënik pëhwëtani nkaŵ vēhnaŵ vēle ŵatid ipëhna lav.

<sup>13</sup> Tac, hnë wës fato, hnë wës ntaŵ yapah do hnë wës kila wamër, nu bu ga canëd wahakili warar waŵeh had wafor wasanjink.

<sup>14</sup> Vëyin ye wahakili Sintani, wale lid wafëmpëhnañah. Njidëni cap vēhnaŵ vēvē nkal fop, ndanko mbarëpëlahnëni soñe wët fac sankaf Wën Hwëhn Fanka Fop.

15 Ahwëhn a ntehnëk: «Wëlin nkeryibu had ale. Mbetak ale heryëk do worryerik viyi vilëwu va, g'antë nji wëtata fo soje antë tav nuyi usëfëhnah lëwu wa.»

16 Wahakili Sintani wa mbarëpënihëhni vëhnaw va hn'ile macik gë Wa-ebëre na Arëmagedon.

### *Kata hwëhn mbëd gë wahi*

17 Ahwëhn mbëd gë vëhi ya campehnëk nërya ntëwu na sël hna do cahnëk hnë Cery Wën hna kopa sankaf le watik tinki ahnaw hna ntehn: «Antiyak!»

18 Tac pëgwëlehn tan mbiliñëtënd, wakopa, wakopa waparät, do nkal ina nënkalehn dus g'ante nkok diyahna kobëri ga nkehahnëk ahnë nkal li.

19 Nkol cankaf na capëko warar do vankol wayal wa fop mbëvëko. Wënu na ndënkwëtajëko nkol cankaf nte wacëde Babilon njëdahna nërya nen ntavah cankaf ntëwu.

20 Fop watinti na nambiko do wahun wa njoko.

21 Wagurye wante rëkëhnëd wakilo wafëhw wahnah g'imbëd (45) g'ambin njohahnidëhëhniwo vahnë va do vahnë va njewëdënihawo Wënu na soje kata wagurye kabi iyi kata nkeho ulakëmak.

## 17

### *Intaw yapah g'ale wafad*

1 Tac, aryampo hnë wamëleka mbëd gë waki hna wante wënkëk vañërya mbëd gë vaki va njijëk ntehno: «Yij, tufëdëmi kitiña asëval ale



yëtahnik igwafa cankaf, umë ye Babilon, ale lañak tëfary wasën hna.

<sup>2</sup> Vëhnaŵ vëvë nkal va g'umë nkwaƒadëni do vële ye nkal va ndëwëni uñen nte nkwaƒandëni.»

<sup>3</sup> Tac Iyir Ipacah njihahniko do mëleka ÿa njoko hnë wula hna. Hnam nubuha asëval kayëka ntaŵ bëntëvëntak nte herik fop mbahn ntëwu hna wëc wayeŵ Wënu do hwëhnaƒ vankaf mbëd gë waki do wamiry pëhw.

<sup>4</sup> Asëval a cudak viyi vële ye had bulu gë vëntëvënt, kayëtak sanu, wëraka wafërën do wanjere. Mënkwëk vák hna ñërya sanu, nte fëbëka wëh do ronk nkwaƒa ntëwu.

<sup>5</sup> Yëka lëwu hna keriko wëc ile hwëhnaƒ ufëhnëtahn soŵik:

«Babilon Cankaf,  
hnëm vële wafad  
do vankeya vakayah  
vante ye nkal vi.»

<sup>6</sup> Do nubuha asëval a ndëwëk sat vëƒacah, rac ye sat waseƒe vële sëmëk soñe Yesu. Ga nubuha apëmpëhnahnëkowo.

<sup>7</sup> Tac mëleka ÿa ntehnëko: «Soñe ye pëmpëhnahnëki? Apëyaƒëmi ile pëhnëtahnëk asëval a do ntaŵ nte ryibëka ñi nte hwëhnaƒ vankaf mbëd gë vaki do wamiry pëhw.

<sup>8</sup> Ntaŵ tac nte nuru ñi nkeho, bare gona. Cahniƒ hatëh hatëwah hna do njid gante mbëvëd. Do vëvë nkal va, vële wok vëherihna wëc kobëri wapëgwala duniya hna, hnë kayëte uwám, vahnë vërac pëmpëhnahnëdëhëhni ge nuniha intaŵ iña, umë ale yeho, wok gona, do vokajëd.

9 «Wati ÿa ye le rëfëka kwëhnahnin wasery gë hakili facah nkwëryahnin waji: vankaf mbëd gë vaki vi ye wahun mbëd gë wahi le ndahëk asëval hna. Vërac ye fëna vëhnaŵ mbëd gë vëhi.

10 Imbëd fagant lëŵ hni njoni, ahwëhn mbëd g'aryaŵ ÿa nkok naŵ, ahwëhn mbëd gë vëhi ÿa wok tëkina ten, bare ante tëkid ña biyëdina.

11 Ntaŵ ante yeho ñi do wok gona, nke umë dënk ahnaŵ ahwëhn mbëd gë vërar. Umë ye fëna aryampo hnë mbëd gë vëhi hna do njid gante mbëvëd ka.

12 «Wamiry pëhw wante hnuru ñi ye vëhnaŵ pëhw vële wok vëhnaŵëna ten, bare wati ryampo, vëhni gë ntaŵ ña nuÿadëni uŵëka ahnaŵ.

13 Vëhni fop nkwëryëla ndampo fo kwëhnani: njëdaniha ntaŵ ña fanka do wëka lëŵ hni.

14 Vëhni wëtarëdëha Fape fa, do Fape fa mëkëdëhëhni, kabi umë ye Ahwëhn vëhwëhn, do Ahnaŵ vëhnaŵ, do g'umë vële wacik va, vëréhnayik va, vële hahnëndak va, mëkëdënihëhni.»

15 Tac mëleka ÿa mbok ntehno: «Wasën wale hnuru wï, wale ntañahnëk asëval ale wafad ÿi, vëhni ye wabulunda, wakore wayabah, wayal do vanësa va.

16 Wamiry pëhw wante hnuru ñi do ntaŵ ñi ñëwëdëniha asëval ale wafad, atëbëdëniha fop do tavëdëniha wëtata fo; tokëdëni mbahn ntëwu do mbëvendëniha gë hwëdëh.

17 Ha, Wënu ña kwëtëk hnë ntaŵary ntëw hni ntihahnëni vile pëhnak nti va: njëdadëniha

unaŵ ntëŵ hni ŋa ntaŵ ŋi, hafo pad wanës  
Wënu ŋa.

<sup>18</sup> Awa, asëval ale hnuru ŷi, ankol cankaŋ ŋi ye  
nte hnaŵëhnëkëhni vëhnaŵ vëvë nkal vi.»

## 18

### *Iyo Babilon*

<sup>1</sup> Ga ndëcëk watac, nubuha mëleka haŵary  
ga cëlid g'ambin. Kwëhnako uŵëka sankaf do  
humpen hudëŵu ha pëtehnëko nkal ŋa.

<sup>2</sup> Ndekako gë kopa sankaf:

«Njok! Babilon Samah ŷa njok!

Ambacak ryaha wayine,

ryaha wahakili waŵeh,

ryaha wasëry waŵeh do waŷëŵik.

<sup>3</sup> Ha, fop wayal ŵa ceni uñen ntëŵu

nte liyehndëfhëhniwo kwëlëkwël le ñëŵëk

Wën:

vëhnaŵ vëvë nkal va nkwafani g'umë,

do vëwaf vëvë nkal va mbetani soŋe hnapul

sankaf lëŵu.»

<sup>4</sup> Do fëna nkwëryëbu kopa haŵary le ŵatik  
ambin hna ga ntehnëd:

«Cahnëryin aŋi nkol, bulunda mën,

ɗanko antë ayentahniŵu wameh wadëŵu,

do antë ahnuŷantiŵu wakata wante rëfëka

ŋi.

<sup>5</sup> Wameh wadëŵu ŋa ndivëlëk hafo g'ambin

do Wënu ŋa ndënkwëtajëk vantiyehn

vameh vambë iŋi nkol.

<sup>6</sup> Diryina had gante ntikëhni vëŷëntaŵ ka,

ɓësaryina wahwënta wahi ile ntik ŷa.

Hnë ñërya uñen nte nkwëntëlehnëhnahnëkëhni  
 vëyëntaŵ va,  
 nkwëntëlëhnehnëryin uñen nte yawëk  
 wahwënta wahi.

<sup>7</sup> Njahnëk ðus icëmb gë hnapul.

Nësëð ntaŵary ntëŵu hna:

“Ami, ahnaŵ, ntañahnëbu tinki ahnaŵ.

Gela asëval ale cëmaryëk asan a do nuða  
 muk ucay.”

Soñe rac, bësarýina uhorot do uýëŵëhna  
 sankaf!

<sup>8</sup> Soñe watac, fac ryampo fo njohahnëðëha wañi  
 wakata:

icëm, ucay, inte. Do mbëvëð gë hwëðëh.

Njaŵëk Ahwëhn a Wëñ hunte hitiñëðëha.

<sup>9</sup> «Fop vëhnaŵ vëvë nkal vële wafak g'umë do  
 ýahëlëk hnapul lëŵu ýa, akodëni do njahnadëni  
 soñe lëŵu ýa, ge nuni hwëcic hwëðëh hunte  
 mbëvand ña.

<sup>10</sup> Añëŵëðëni ñaŵët soñe ntakah iýi horot do  
 ntehnëðëni:

«“Kata! Kata! Babilon, nkol camah! Nkol  
 yaŵah!

Wati ryampo fo njijëk kitina hu ña!”

<sup>11</sup> «Do vëwaf vëvë nkal va kodëni do  
 njahnadëni soñe lëŵu ýa, kabi ahnë bokëðina  
 ntaŵ viýë vilëŵ hni va:

<sup>12</sup> viýë sanu, kori, wëraka walakëlah, wan-  
 jere, wafand wahihnah gë wavëntah, wadëhwa  
 wadakëlah do fop vile fërik gë beñ iñi, gë  
 wadëhwa wapëren, ile vudik, gë ryëhwëra do  
 gë wëraka wawamah,

13 upih nte hnëjënëd rokëtok, wafatikola do gë iduf, uñen, wagu, pih do watoka, wuhni gë wape, wafahnac gë wasaret, vëramp gë vële fëlayik.

14 «Wadëwël wabëntah wante valëkino ña ñawëtaki, fop vële wamahnëki vi do fëtëd vi cëvoryiki do bokëdëna nuyi.

15 Vëwaf vële mbetëndanëk va ñawëtiniho, soñe ntakah uhorot lëwü wã; kodëni do njahnadëni.

16 Ntehnëdëni:

«“Kata! Kata! Nkol camah ña  
 cudak wafand wahihnah fo  
 do gë pand bulu gë mbëntah nte hambëka  
 ntaw  
 do kayëtak sanu gë wëraka walakëlah gë  
 wanjere!»

17 Wati ryampo fo përekanik iyi hnapul fop!”

«Do vëyaryary Sisikulu va fop, fop vëryokun  
 hnë wënka va, añëwëni ñawët.

18 Ante nuhni hwëcic hwëdëh hunte  
 mbëvahnëd ña ndekaniho: “Añëhne nkol ga  
 këñëlahnëni anj nkol cankaf!”

19 Pihani vëd hnë vankaf vantëw hni, koni, do  
 njahnani:

«“Kata! Kata, nkol camah  
 ante vetëndanëkëhni fop vële hwëhna wa-  
 sisikulu hnë wov hna!  
 Wati ryampo fo përekanik fop!”»

20 Kopa ña më mbok ntehnëk: «Ambin, natëryi  
 yi soñe ile përekanik nkol ñi!  
 Natëryiñu, wühne fëna, vëfacah, vëfayik do  
 wakila,

kabi Wënu ña kitinëka soñe wëh ile ntiku  
ÿa.»

<sup>21</sup> Awa mëleka hwëhn fanka ryampo nufëk  
taka dënah, më ntonëk wov hna ntehnatënd:

«Koyëna, gë fanka përekanëde Babilon nkol  
camah  
do mbokëdëna nuyi.

<sup>22</sup> Do mbokëdëna nkwëry ÿal hu  
kopa nkaŵ vërëmp tëmp,  
vësël takëralu do vëlënkŵ,  
fëna wëla aseryah aryampo gedina ÿal hu  
hna.

Do fëna kopa tank gë hont bokëdëna nkwëryi ÿal  
hu hna.

<sup>23</sup> Humpen lampu ÿa bokëdëna pët ÿal hu hna.  
Kopa aÿëlah ahasëk gë asëvalu bokëdëna  
nkwëryi ÿal hu hna.

Vëÿin fop koyëna nkef kabi vëwaf vëlëw hu  
va yeho vëhnaÿah vëvë nkal va, do kavëla  
hu ña tokakëhni fop wayamani ña.

<sup>24</sup> Mbëvehnëderu kabi ÿal hu hna tëkatik sat  
wakila gë  
vëfacah fop, vële ryawëik nkal li.»

## 19

### *Hnëw ÿëka ambin*

<sup>1</sup> Ga ndëcëk watac, nkwëryëbu had kopa  
bulunda samah mbin hna le ryekadëho:

«Aleluya!

Ipeh ña, icëmb inja do gë fanka fa vëhni Wën fu  
hna nke.

<sup>2</sup> Vakitiña vantëwü va catëk do toña ye.

Kitinëka asëval ale yëtanik gwafa ntëwü,

ale ronkëndëho nkal gë gwafa ntëwu,  
koroteyehnëhneka soje sat vëryokunj vëlëwu  
va.»

<sup>3</sup> Mbok nësëni kat:

«Aleluya! Hwëcic hwëdëh hunte mbëvahnëd  
Babilon Samah ña kayëndad dol do gë  
kantëm!»

<sup>4</sup> Tac vacërakëlo wafëhw wahi gë vëhnah (24)  
do wulañ wannah (4) wã ndëkwëhneniho,  
cëmbëniha Wënu ña ga ntañak tinki ahnañ hna  
nësatëndëni: «Nke koyëna! Aleluya!»

<sup>5</sup> Tac cahnik kopa mbë tinki ahnañ hna ntehn:  
«Cëmbëryina Wën fu ña, wühne fop vëryokunj  
lëwu,  
wühne, vëhinnah gë vëryindah, vële ntakëd  
g'umë!»

<sup>6</sup> Do nkwëryëbu had kopa bulunda yabah,  
had kopa wavonkëlo wënka wacankaf, do had  
wakopa waparar, nësatëndëni:

«Aleluya! Ahwëhn Wën fu ña Ahwëhn Fanka  
Fop ña  
tufahnëk inawñ ntëwu ña.

<sup>7</sup> Natëfu, nëjëfu,  
cëmbënëfuna kabi ambënt ñël Fape fa tükik,  
do ale tëhna a këbënak.

<sup>8</sup> Mawëryahnik cufa viyi vihinah vëfëtëpët  
do vëfacah, viyi vihinah vi ye vantiyehn va-  
catak mba vëfacah.»

<sup>9</sup> Mëleka ña më ntehnëko: «Kerëry: Mbetani  
vële wacik hnë mbënt Fape fa!» Më mbok  
ntehnëko: «Wani ye wanës paryi Wënu ña.»

<sup>10</sup> Tac ndëkwëhnebu hnë wapary mëleka hna  
sëmbahnëwa, bare umë ntehnëko: «Kehary  
antë ali wani! Ami ye arëfëlënta hun ña doku

hna, wëjë gë wëyënta hu, wële ye wasede Yesu. Ha, fop wante pëyahnëdëni wakila ña, wëba Yesu ye had gante tufëkëhni Iyir Wën ka. Awa cëmbëryehna Wënu ña fo!»

### *Soñe viyë mbëd gë wahi vile ryëcëtaf*

#### *1. Soñe ale hayëka pahnac yah*

<sup>11</sup> Tac nubu ambin ña pidëtak do wëlinëha pahnac yah. Ale hayëka ÿa wëcëde Ahahnëndak do Toña. Kitiñëd do mëtaryëd g'usatah.

<sup>12</sup> Vinkër vidëwu va nkeho had humpen hwëdëh; pënkwo vapënkwo ahnaŵ; akwëhnako wëc ile herik hnë mbahn dëwu hna do wok yëtina afo umë.

<sup>13</sup> Acudako cud nte hoyik hnë sat. Wacik: «Wanës Wën».

<sup>14</sup> Wasodade wavë ambin tëfalëdënihaŵo hnë wafahnac wayah, wëhni fop viyë vëyah do wëfacah cudaniho.

<sup>15</sup> Hnë wës lëwu hna canëdëho sëlame ÿakah soñe ndafahnëhni wayal wë. Keryëdëhëhni gë ryoko ryëhwëra, ñwëyëhned waresen hnë tank camah ntawah mba Wën Hwëhn Fanka Fop.

<sup>16</sup> Hnë cud ntëwu hna do hnë mbuf ntëwu hna kerik wëc: «Ahnaŵ wëhnaŵ do Ahwëhn wëhwëhn».

#### *2. Ambënt Wën soñe wasëry*

<sup>17</sup> Tac nubuha mëleka ryampo ga kahnëk lav hna. Ndekahnëkëhni gë kopa sankaf fop wasëry wale watëd cëmët ambin hna: «Yijën, barëpëlin soñe ambënt cankaf mba Wën,



18 soje aroku mbahn vëhnaŵ, mbahn vësankaf wasodafe, mbahn vëhwëhn fanka, mbahn wafahnac do gë vële hayëkëhni va, mbahn fop vële ye vëramp gë vële wok vëyena vëramp, vëhinnah gë vëryëndah.»

### *3. Soje ntaŵ ŋa gë kila wamër*

19 Do nubuha ntaŵ ŋa, vëhnaŵ vëvë nkal va gë wasodafe walëŵ hni. Mbarëpëlëni mëtaryëniha ale hayëka pahnac yah ŋa gë wasodafe walëŵu ŵa.

20 Pëlaniha ntaŵ ŋa gë kila lëŵu ŷa vële liko haryënkŵ lëŵu vifëmpëhnahnah wante tokahnëkëhniwo vële hwëhnak yavëta ntaŵ ŋa do sëmbëdëho wëntëlënta lëŵu. Fop vëhni vëhi tak ntonjini vëfërën fo hnë lant hwëdëh hn'ile ŋagëd uvëd.

21 Vëyëntaŵ va fop mbëvëni gë sëlame le sanidëho hnë wës ale hayëka pahnac ŋa, do fop wasëry ŵa pihnnëniho vimbahn vidëŵ hni va.

## **20**

### *Wabëhn wuli*

#### *4. Soje pëla Sintani*

1 Tac, nubuha mëleka ryampo ga cëlid g'ambin. Amënkŵëko hnë vák lëŵu hna sëdëta hatëh hatëŵah gë vankënca vantënah.

2 Më pëlaka fato fa, lën sër ile ye yine do Sintani, do ñaba soje wabëhn wuli.

3 Më ntabëka hnë hatëh hatëŵah, pidëk gë sëdëta hatëh ha, g'antë mbok tokahni wayal ŵa,

hafo pad wabëhn wuli wã. Ge ndëcëk watac, tēfëka tavi soje toye fo.

<sup>4</sup> Do nubu watinki vëhnaŵ. Vële yijëd ntañani va, njëdayini fanka kitinahnëni. Nubu fëna wayiry vële lëpëtik vankaf va soje ucedeya ntëŵ hni wëba Yesu do wanës Wën, do fop vële wok vësëmbëlahna ntaŵ ña g'ile wëntëlëk g'umë do wok vëhwëhnana yavëta lëŵu yëka lëŵ hni hna ma vák lëŵ hni hna. Mbokajëniho hnë uwám hna do naŵëniho gë Këris ÿa hafo wabëhn wuli.

<sup>5</sup> Umë ye ifëhn ndënkwëryënk wã. Vësëm vëyëntaŵ va vëvokajëna hnë uwám hna ani gë padahn wabëhn wuli ña.

<sup>6</sup> Mbetani do vëŷahnik Wën nkeni vële yentahnik hn'ifëhn ndënkwëryënk hna. Hnë vëhni icëm kigëna ña kwëhnana fanka; vëhni yed vësëna vëva Wën do gë Këris ÿa, do naŵëdëni g'umë wati wabëhn wuli ñi.

### *5. Soje itav Sintani*

<sup>7</sup> Wati nte padëd wabëhn wuli ña, Sintani ÿa tavëde gë kaso lëŵu,

<sup>8</sup> do njidf tokahni wayal, wale wacik Gog gë Magog, hnë vacape vanah hnë duniÿa li. Umë varëpëdëhëhni soje wët: iyaß ntëŵ hni ña nke had nkërëyal mbë wov.

<sup>9</sup> Më campëni duniÿa li fop do kwërëlehnëni sary vëfacah, nkol nte ñahnëk d'us Wënu ña. Bare cëliko ambin hna hwëdëh mbëvehnëlehnëni fop.

<sup>10</sup> Do Sintani ile rokadëhëhniŵo ÿa, ntabiko hnë lant hwëdëh gë vëd le fëdëd, ðarël ntaŵ

ña gë kila wamër. Korotëdëni d'us g'anent gë g'umëd soje kantëm.

### *6. Soje ikitiŋ*

<sup>11</sup> Tac nubu tinki yah sankaf ahnaŵ a do ale lañak. Haryënkŵ lëŵu nkal ña gë ambin ña nkaryëni hara vëravëna dahëse,

<sup>12</sup> do nubuhëhni vësëm va, vëryëndah gë vëhinhah, kahnëni haryënkŵ tinki hna, do vakayëte va pidëtiko. Kayëte kaŵary fëna pidëtiko: kayëte uwám ŵa, do vësëm va kitiŋiniho gante ntiniho ka, gante kerik hnë kayëte ka.

<sup>13</sup> Wov ŷa mbësahnëkëhni vësëm vëlëŵu va, icëm ña gë ŷëŵa vësëm ŷa mbësahnëkëhni vësëm vëlëŵu va, do ale-wo-ale kitiŋiko gante ntiko ka.

<sup>14</sup> Tac icëm ña do ŷëŵa vësëm ŷa ntonjiko hnë lant hwëdëh hna. Lant hwëdëh ye icëm kigëna ña!

<sup>15</sup> Do ale-wo-le woko kerina hnë kayëte uwám hna ntonjiko hnë lant hwëdëh hna.

## 21

### *7. Soje ambin kasëk gë nkal kasëk*

<sup>1</sup> Tac nubu ambin kasëk do gë nkal kasëk. Ambin ndënkŵeryënkŵ ña do g'inkal ndënkŵeryënkŵ ña nambiko, do wov ŷa golohna.

<sup>2</sup> Do nubu ga cëlëd hnë ambin hna, darël Wën hna, nkol pacah, Yerusalem kasëk, had asëval ale hëbënak soje asanu fac ñël hna.

<sup>3</sup> Do nkwëryëbu kopa sankaf le w̃atik tinki ahnaŵ ntehnatënd: «Yëkëry: idëf Wënu ña gë vahnë va nke. Antëdëf gë vëhni, ankedëni bulunda lëwu. Umë dënk gë vëhni nked, Wën hudëw̃ hni yed.

<sup>4</sup> Apëhwëcëdëhëhni fop wagwën vinkër vidëw̃ hni hna. Cëm ña godina, ma usay, ma wako, ma horot; duniya sër ÿa nambik.»

<sup>5</sup> Ale lañak tinki ahnaŵ hna ntehnëk: «Wëlin g'antidëfu fop viyë vëhasëk.» Do mbok ntehn: «Kerëry: Wañi wanës ye wante hode kwëtahni do ye toña.»

<sup>6</sup> Do mbok ntehno: «Antiyak. Ami ye Alëfa gë Omega, Wapëgwala do gë Wapuyala. Ale njok wënka njëdadëfuha aki fo hayalin wënka uwám.

<sup>7</sup> Ale wëkëk a nuyađ intëw̃, nkedëfu Wën hudëwu do umë yed fatah mën.

<sup>8</sup> Bare soñe vëhëmak va, vële wok vëhahnëndana va, vëwëh va, vëryaŵ vahnë va, vële wafađ va, vëhav va, vële yëfađ wasank va, do fop vëwër va, sah lëw̃ hni ÿa hnë lant le hëwëf hwëdëh nke; umë ye icëm kigëna ña.»

### *Soñe Yerusalem hasëk*

<sup>9</sup> Tac aryampo hnë wamëleka mbëf gë vëhi hna ale wënkëko vañërya mbëf gë vaki va tëmpah wëkata mbëf gë waki ña njijëk do ntehnëko: «Yij, tufëdëmina ale hwëhnik a, ale ñëlëf Fape fa.»

<sup>10</sup> Awa, Iyir Ipacah ña njijëk hnë ÿal mën do njoko yañ hnë kuñ cankaf, do tufëko Yerusalem, nkol pacah ña, nte sëlif ambin ñarël Wën hna.

11 Pëtëdëho gë icëmb Wënu ña. Mpen ntëwu ña mëntëlëko gë taka dakëlah, had taka nte ravëd nuyi kamëhni lëwu ÿa.

12 Akwëhnako kece ryindah do hnaÿah. Kwëhnako warënka pëhw gë wahi (12) do haryënkwo rënka-wo nkeho mëleka ryampo do hnë rënka-wo keriko uÿac: uÿac wahnënk pëhw gë wahi (12) vutah Isërayel va.

13 Nkeho gë pëhna lav warënka warar, gë farëhw warënka warar, gë farahahn warënka warar, gë njoya lav warënka warar.

14 Kece vankol ÿa njëryiko hnë wëraka pëhw gë wahi (12) do hnë itaka-wo keriko uÿac vëfayik pëhw gë wahi (12) Fape fa.

15 Mëleka le hnësëhnëdëho ÿa mënkweko ÿëña sanu soñe ñañahn nkol ña, warënka wã do gë kece lëwu ÿa.

16 Nkol ña këñëlahnëko vacape vi fop: yary ña këñëlahnëko gë yank ña. Añañëko gë ÿëña ile mënkweko ÿa, ndëkwëk waÿëña wawuli pëhw gë wahi (12,000). Yary ña, yank ña do gë yihn ña këñëlahnëko.

17 Ñañëk kece ÿa, ndëkwëk waÿëña keme gë wafëhw wahnah gë wahnah (144), ÿëña vahnë mbalëtahnedëho.

18 Kece nkol ña njëryiko gë wëraka walakëlah waryunënkah do nkol ña nkeho sanu facah fo ile wëntëlëk gë sëleku facah.

19 Hnë wëraka wale njëryahniko kece vë nkol ÿa nkeho fop wasifa wëraka walakëlah. Taka dakëlah ndënkwekyënkwo ña yasëp yeho, kigëna ña safir, tarëna ña nkeho kalësedëwan, nahëna ña emërod,

20 bëryëna ña sarëdëwan, kwëhn mbëd g'iryawñ ña wakorënalín, kwëhn mbëd gë wahi ña wakërisolit, kwëhn mbëd gë warar ña waberil, kwëhn mbëd gë wahnah ña watopas, kwëhn pëhw ña kërisopëras, kwëhn pëhw gë ryampo ña iyasent, kwëhn pëhw gë wahi ña ametisët.

21 Warënka pëhw gë wahi (12) wã yeho wanjere pëhw gë wahi (12). Rënka-wo uyere ryampo fo ye. Do ankañ hnëm mbë nkol ña nkeho sanu facah had sëleku lancah ile ravëd nuyi hamëhni lëwũ.

22 Bare Cery Wën Cankaf gelohna hnë nkol tac kabi Ahwëhn a Wën Hwëhn Fanka Fop fa ye Cery tac, ndampo fo gë Fape fa.

23 Nkol ña balëlahna lav ma lepera soje penënda, kabi idanc Wënu ña penëka, do Fape fa humpen hudëwu ha ye.

24 Wabulunda njasëdëni hnë mpen ntëwu hna, do vëhnañ vëvë nkal va njojëdëni wahnapul walëw hni wã.

25 Warënka walëwu wã bokëdina picfa kabi umëd ña bokëdina nke.

26 Njojëde hnapul gë untënah wabulunda ña.

27 Ñoñ ile wok pacëna bokëdina ténk hnë nkol tac, lakënde vële lid ile wok catëna ýa do vëwër va; vële herik wac hnë kayëte uwám mba Fape fa fo rënkëf.

## 22

1 Tac, mëleka ýa tufëko garyëla sankaf wënka uwám wã ile yalidëho hnë tinki Wën hna do Fape hna, pëtatënd had sëleku.

<sup>2</sup> Fagant yëwã vë nkol yã do cant garyëla hna nke atëh uwám nte lëwëf wahwënta pëhw gë wahi (12) bëhn hna. Lepera-wo-lepera antëwëf, do yaryef lëwu yã njehnahnëdëniho wabulunda ña.

<sup>3</sup> Ntavah Wënu ña njamënik, kata godina. Tinki Wënu ña do gë Fape fa yed nkol hna, do vëryokuñehn Wën va ndokuñehnëdëniha g'icëmb.

<sup>4</sup> Anudëni yëka lëwu yã do wac lëwu yã nked hnë yëw lëw hni hna.

<sup>5</sup> Bokëdina nke umëf, vahnë va vëvokëdina mbalëhni humpen lampu, ma humpen lav, kabi Ahwëhn Wënu ña campehnëhnëdëhëhni humpen hudëwu ha, do nawëdëni kantëm.

<sup>6</sup> Tac mëleka mbok ntehno: «Wañi wanës ye wante hode kwëtahni do ye toña. Ahwëhn a, Wën wahakili wakila, payika mëleka lëwu yã tufëhni vëryokuñ vëlëwu va ile rëfëka tëki biyëdina.»

<sup>7</sup> Yesu më ntehnëk: «Njijëdëfu biyëdina. Mbetak ale wawëhnëk wanës Wënu ña wante ye kayëte li.»

<sup>8</sup> Ami, San, nkwëryëbu do nubu watac. Ante nkwëryëbuho do nubuhò ña, ndëkwëhnëbuho wapary mëleka le rufahnëdëho watac ña, sëmbahnëwa.

<sup>9</sup> Bare ntehnëko: «Antë ali wañi! Arëfëlënta hu doku hna yebu, gë wëjë do gë vëyënta hu wakila ña, do gë vële hwëtaf wanës wade herik kayëte hna. Wënu ña fo rëfëka asëmbënd.»

<sup>10</sup> Mbok ntehno: «Antë asowëhni vahnë va wanës wante ye kayëte li, kabi wati le

hahnëndik soŋe vēĩn va tëhajëk.

<sup>11</sup> Ale rumpak a nko ntind watumpak, ale wok pacëna ŷa nkonti hnë ronkah hna, bare asatah a nko ntind usatah do afacah a pacëna kat.»

<sup>12</sup> «Wëli, nijjêdëfu biŷëdina. Njonëhnëdëfuha ami dënk ale-wo-le ile rëfëka nuŷa ŷa, vësaŷa gante ntik ka.

<sup>13</sup> Ami ye Alëfa gë Omega, Aryënkwëryënkw a gë Arëkwa ŷa, Wapëgwala gë Apuyala ŋa.

<sup>14</sup> «Mbetani vële ryagëd vacud vantëŵ hni: tënkëdëni gë warënkã vë nkol ŵã do tokëdëni atëh uwám ŵã.

<sup>15</sup> G'ipër nkeni wabe ŋa do gë vëhav va, vile wafad do vëryaŵ, vële sëmbëd wamën wamër, ale-wo-le ŷahnëk ma lid wamër!

<sup>16</sup> «Ami, Yesu, payëbuha mëleka mën ŷa njonëhniŵu inji cedëya soŋe vacery sali. Ami ye hnënk David, ikol nte fëtëd nkëhnëfacëd a.»

<sup>17</sup> Iyir ŋa gë aŷëlik a nësëni: «Yij!» Ale-wo-le wëryëk ŷa nës: «Yij!» Ale-wo-le njok wënka ŋa nijj. Ale-wo-le ŷad wënka uwám ŋa, nijj centi aki fo.

<sup>18</sup> Ale-wo-le wëryëk wanës wante kerehnëko Wënu ŋa hn'ani kayëte, paryi pëyadëmu: ge ahnë nkwënëk iñë, Wënu ŋa nkwënëhnëdëha wakata wante herik hnë kayëte tac.

<sup>19</sup> Do ge ahnë ŋayëtëk wanës inji kayëte, Wënu ŋa ŋwanjêdëha sah lëŵu ŷa hnë atëh uwám do hnë nkol pacah hna.

<sup>20</sup> Yesu pëyahnëk wani fop toña ye do ntehn: «Ha, nijjêdëfu biŷëdina.» Nke koyëna. Yij, Ahwëhn Yesu!



<sup>21</sup> Arabi ipërëna Ahwëhn a Yesu nke gë wñhnë  
fop!

**Wamey**  
**Wamey: Vikerëh Vikasëk Wën gë Wapëgwala (New Testament+)**

copyright © 2018 Wycliffe Bible Translators, Inc.

Language: Wamey

Contributor: Wycliffe Bible Translators, Inc.

All rights reserved.

2025-04-30

---

PDF generated using Haiola and XeLaTeX on 30 Apr 2025 from source files dated 1 May 2025  
f961026b-f72f-5bd7-9f75-efa7f932577e